


學海類編

第一百十七册



益部談資卷上

明 安陸何宇度仁仲著

王逸少生平最愛蜀之山川渴欲一遊與周益州書云
省足下別疏具彼土山川諸奇楊雄蜀都左太冲三
都殊爲不備悉但言此心已馳于彼矣又云吾有七
兒惟一小者未婚過此便得至彼得果此緣一段奇
事又云鹽井火井皆有不峨嵋山夏含霜雹碑板之
所聞崑崙之伯仲也其言不一而足雖雅志未酬千
載之下猶與此中山水爭勝

逸少帖遊目汶領卽岷嶺用古字也與謝東山書嘉州
舊有石刻今不復存

宋陸務觀范石湖皆作記妙手一有入蜀記一有吳船
記載三峽風物不異丹青圖畫讀之躍然

益州耆舊傳漢陳壽作益州記漢李膺作華陽國志晉
常璩作成都記唐盧求作蜀檣杙宋張唐英作成都
古今集記宋趙抃作續記宋王剛中作蜀鑑宋李文
子作丙丁二記宋范石湖胡長文作夔記本朝郭棐
作諸書僅華陽國志蜀鑑蜀檣杙夔紀有刻餘俱漫

漶久矣

玉壘青城俱在灌縣雪山在茂州峨嵋在嘉定李白讀
書匡山在彰明劍閣在閬中岨峽在眉州瓦屋在榮
經俱海內名山鼎峙珠聯盈于境內

全蜀藝文志楊用修所編也網羅金石鼎彝秦漢之文
幾盡可謂博矣然惜太繁刻在藩司已不存太平清
話云四川總志惟藝文一卷乃用修所選立例最古
似殊不然豈俱未見二書乎

蜀之山大約近江源者皆謂之岷山峰連岡屬千里不

絕今俗謂青城爲岷山者以此又聞凡稱岷嶓者該
眾山言也凡稱沱潛者該眾水言也蓋蜀山之居左
者皆曰岷居右者皆曰嶓水出于岷者皆謂之江出
於嶓者皆謂之漢或謂之漾或謂之沔出于江而別
流別而復合皆謂之沱出于漢而別流別而復合皆
謂之潛古今論岷嶓沱潛者眾矣參差不一莫得其
真惟由不知左者皆得爲岷右者皆得爲嶓而獨指
茂州之汶山爲岷山金牛之嶓豕爲嶓山隘矣然今
嶓豕又改隸陝西非蜀可得並論也

蜀之水宋王象之言之頗悉四瀆惟江最大發于岷逕
夔荆而入于海自蜀而言江之外其水有七出于縣
州者縣水出于什邡者洛水分流于永康者湍水三
水皆合于雒自雒逕懷安簡資富順至瀘與江水會
總曰內水發源于江納逕縣潼東至于合曰涪水發
源於沔逕大安利閬合于涪水曰嘉陵水發源于小
巴嶺逕巴蓬至于渠曰巴水出萬頃地逕與巴水合
曰渠水巴渠二水合而與嘉陵涪水會以達于渝而
江始大若分流出夷中入中國以附于江者有三曰

青衣曰羊山曰馬湖青衣逕洪雅夾江而下羊山逕漢源至嘉定馬湖自夷都流至叙俱與江合而下夔峽惟漢水出蟠冢與江分流由漢金趨襄至江夏大別山始與江合而達于海

蜀之文人才士每出皆表儀一代領袖百家漢如楊雄王褒司馬相如唐如陳子昂李白宋如蘇家父子元如虞集豈他方所能比擬然不特此香奩之彥若花藥當壚製箋才情豈在人下

火井邛州蓬溪富順咸有之蜀都賦火井熒於幽泉高

大焰煽于天陞註曰欲出其火先以家火投之須臾焰出以竹筒盛之其火無灰井有水火取片火煮水一斛得鹽五斗家火然之則鹽減邛州南設有火井巡檢司蓬溪者地窪若池以火引之有聲隱隱出地中少頃炎熾夏月積雨停水則焰生水水上水爲之沸而寒如故秋冬水涸則土上有焰觀者至焚衣裾

油井在嘉州眉州青神井研洪雅犍爲諸縣居人皆用之然燈官長夜行則以竹筒貯而然之一筒可行數里價減常油之半光明無異

茶為蜀中郡邑常產蒙嶺在名中霧中在大義俱擅古今名品世又謂峨嵋之味初苦而終甘茶經又云瀘縣初春所採不減江南鹽井各州邑多有之大小不一深可數十丈上孔僅杯孟大用竹作長筒垂下取水而煎曬即成鹽業此有成富者亦有家為之累者隨其所遇然開井祇憑堪輿家言不知何術得此

大禹史稱生于西羌方輿志謂今石泉縣之石紐村是

其發祥地也山石紐結題有禹穴二字傳為李太白所書塗山氏之塗山今在重慶城外即其后家耳後因巡狩而南崩于會稽會稽亦有禹穴者乃其葬處元帝幻身在今中江之雲臺山峰岫逶迤殿宇宏麗乞靈者踵接另有志可考

文昌帝君傳云降生于越之西雋之南兩郡之間今之大梓潼縣是也志稱祠中刻有帝親筆書自作紫府飛霞洞記落筆精妙命詞簡遠惜未得觀

許真君名遜洪州人也嘗為德陽縣令有仙術歲歉點

石化金以濟民今縣治有煉丹井煉丹臺遺跡存焉
卽豫章鐵柱宮所祀者

大峨山者普賢大士道場西竺僧所稱高出五岳秀甲
九州震旦第一山也有蘇稽渡故子瞻讀書處及魏
鶴山陳圖南諸墨蹟石下泉水云與楚玉泉寺通郭
景純賦峨嵋爲泉陽之揭殆是乎歌鳳臺爲昔楚狂
棲隱處中峰寺有孫思邈藥鼎小鳥如鸚鵡鳴曰佛
現向人合掌取食蒼鼠成羣了不避人石徑寸者常
放光日射如虹入蜀不遊此何以稱奇

宋祁有益部方物贊曰海椶曰楫曰橙曰竹柏曰海芋
曰紅豆曰紫竹曰慈竹曰椶竹曰方竹曰柑曰赤鸕
芋曰綠蒲萄曰天師栗曰天仙果曰隈支曰錦被堆
曰錦帶花曰石蟬花曰長生草曰瑞草曰紅蕉花曰
重葉海棠曰月季花曰佛豆添色拒霜花曰黃荼蘼
曰艾子曰鴛鴦草曰娛美人草曰仙人緡曰羞寒花
曰瑞聖花曰七寶花曰旌節花曰娑羅花曰木蓮花
曰鵝毛玉鳳花曰蒟曰眞珠菜曰朝日蓮曰蟬花曰
燭麻曰水硫黃曰附子曰石瓜曰芎曰大黃曰餘甘

子曰金星草曰桐花鳳曰紅桐鶯曰荏雀曰護花鳥
 曰百舌鳥曰狻曰龍羊曰獲曰魴魚曰嘉魚曰鮭魚
 曰黑頭魚曰沙綠魚曰石鼈魚曰金蟲凡六十五種
 武擔山在藩司右西蜀記蜀王開明妃死遣五丁擔土
 為冢而成以是得名史稱昭烈即位于武擔山之南
 即此

楊妃池在灌縣東太真外傳云妃父元炎為蜀州司戶
 妃生蜀嘗誤墜池中故後世池以妃名
 文君井在邛州采蘭雜誌載文君閨中一井文君手汲

則甘香沐浴則滑澤鮮好他人汲之與常井等今白
 鶴驛中之井是水尚清澈州人釀酒必取之
 眉州象耳山舊有李白題石云夜來月下臥醒花影零
 落滿人衣袖疑如濯魄冰壺也真千古佳話
 播州今改遵義府即漢之牂牁唐之夜郎也李白貶于
 此志載流寓以白稱首

簡州逍遙洞有漢碑止十二字云漢安元年四月十八
 日會仙友旁書東漢仙集雷題乃古隸
 資縣有唐顏魯公書中興頌刻于廢寺磨崖上石理甚

學海類編 卷之七 遊覽
粗字半漫滅去碑五里河名唐明渡云明皇駐驂之
所

資縣球溪有僧化去今九年矣幻體如生或稱曰活佛
或曰乾和尚葉令爲繪圖作詩表之

眉州有蘇長公水坻小像李龍眠畫子由贊雖國初重
刻不失古意又有長公馬券刻黃魯直跋及醉翁亭
記水調歌頭諸碑皆近代效滁黃鑄者

潼川卽古梓州城外牛頭寺在焉形如伏牛竹樹迢遞
不負昔賢稱賞問牛頭之稱山僧指以路旁小石而

州之俗人又刻龍于石俱可笑也山上俯視城郭江
流如畫第青山意不盡之句無一碑刻不免是此邦
缺事

漢州古廣漢也新都卽楊用修故里宅第不甚宏麗問
之遺書僅存一二

杜宇亦曰杜鵑蜀人稱爲望帝魂所化其說前人言之
詳矣志稱成都有望帝廟

荔枝叙馬瀘涪合俱出嘉定富順亦有之叙瀘爲上涪
合爲次嘉州今止一二株屬之蜀藩華陽國志載漢

宣帝時荔枝開日二千石張具其下邀賓賞之一騎
紅塵妃子笑蓋從棧道入關耳涪舊有妃子園顆最
肥大馬馳七日夜即抵長安其速如此所謂無人知
是荔枝來也重慶營昌諸處又聞亦有龍眼

白居易爲木蓮荔枝圖各紀其狀曰荔枝生巴峽門樹
形團團如帷蓋葉如桂冬青華如橘春榮實如丹夏
熟朶如蒲桃核如枇杷殼如紅繒膜如紫綃瓤肉潔
白如冰雪漿液甘酸如醴如酪若離本枝一日而色
變二日而香變三日而味變四五日外香味盡去矣

邛竹出邛州之邛崃山即古臨邛地也漢張騫奉使西
域得高節竹還而植此今人取以爲杖鶴膝者佳又
叙州亦出此竹雅州復有一種名羅漢竹皆爲杖之
具

海棠有色而無香惟嘉州色香竝勝大足治中舊有香
霏閣號曰海棠香國謂杜子美諱母乳名詩中不之
及恐亦宋人傳會

諸葛菜即古之蔓菁今之紅蘿蔔也武侯謂視諸蔬有
六利四時各食其根莖心葉令軍中所至咸種蜀故

以是名之

蒟醬見于相如揚雄左思諸賦中註云緣木而生其子如桑椹蓋棘道通越雋之地出蒟棘人取以爲醬棘地卽今叙州也問之莫答或云今之雞鬃油及滇中窶葉皆相彷彿晉灼註拘音矩徐廣注拘亦作蒟音窶

蜀檮杌載孟昶十月宴芳林園賞紅梔花乃青城山進三粒子種之而成者其花六出而紅清香如梅今不可得見

傳稱雷威作琴不必皆桐遇大風雪之日酣飲著篔簹獨往峨嵋山深松中聽其聲連延悠揚者伐之斲以爲琴有最愛重者以松雪名之故世稱雷威琴

東川有夷一種名曰熨人烏蒙卽古賈地漢爲牂牁郡鎮雄卽古芒部地天全卽古氏羌地黎州卽古西南夷笮都地漢爲沈黎郡龍安卽古冉驩地松潘亦古氏羌地漢設護羌校尉居此雪嶺在其境內建昌卽古越氏羌雋郡又謂之獠郡其夷又謂之羅羅

西番與蜀相近貢道必由錦城有三歲一至者有一歲

一至者其貢則小鍍金銅佛銅小寶塔彩色小畫佛
銅鐵刀劍盔甲及珊瑚吹噓香舍利子璣璣諸貨也
舍利子止小菘豆大紅紫色用香緜包裹問其俗云
伊國人初生時即能言前生功果者國王拜爲國師
僧人老死能前知死期而以所餘付後人者國人即
謂眞佛遂合眾同焚從灰燼中得舍利今來獻貢之
僧皆係中年紅補衣僧帽束五彩軟帶乃伊國之尊
官法師中朝之賜衣也言語不通中華食牛羊肉而
飲酒番物名不一志載惟足力麻鐵力麻璣璣三種

而自蜀人言者有曰細毯工布氎毯絨邊工毯姜納
大貨貼裏縣惟憑粗細顏色定價值

川扇不知起自何時然李德俗有畫桐華鳳扇賦云未
若繪茲禽于素扇動涼風于羅薦則唐時此地已嘗
製之矣竹本蜀所富有第不甚堅厚紙則出嘉州彭
縣輕細柔薄惟可製扇是其來已非一日欲不充貢
得乎

諸葛鼓乃銅鑄者其形圓上寬而中束下則敞口大約
若今植斗之倒置也面有四水獸四周有細花紋其

學海類編 卷之三
遊覽
色不甚碧綠擊之彭彭有聲如鼓云置于水擊之其聲更鉅

長腰鼓卽古之蜡鼓也長七八尺以木爲桶腰用篾束二三道塗以土泥兩頭用皮蒙之三四人橫擡扛擊州郡獻春及田閒秧種時農夫皆擊此復雜以巴渝之曲

熊之爲物多係獸形諸深山中人跡罕到處皆有之力能食虎其皮色黑而大勝于虎掌味固佳然聞身之味亦不減

道書載中國名山青城峨嵋爲西嶽佐理又三佐命山及十大洞天皆有青城而福地七十二則巫山臨邛平都在其列

青城山唐杜光庭記岷山連峰接岫千里不絕青城乃第一峰也山有七十二小洞八大洞道書以爲第五洞天神仙都會之處

八陣圖有三處一在新都牟彌鎮一百二十有八當頭陣法也一在夔州六十有四方陣法也一在碁盤市二百五十有六下營法也

劍閣兩崖峻拔鑿石架閣而爲棧道秦司馬錯由此伐
蜀

籌筆驛在廣元武侯出師嘗駐于此唐李義山詩云魚
鳥猶疑畏簡書風雲長爲護儲胥徒令上將揮神筆
終見降王走傳車此其地也

石繖在安廣石船在大竹俱江中皆以形名

聖燈蓬山者爲最初出三四點漸至數十點高下相應
離合不常未知何物

虎豹此邦常產其鞞艾葉金錢爲佳然聞有銀邊金錢

者羊名蟠者其角年久而蟠皮可坐數人羚羊皮毛
色青兵中臥之有警則自動天狗皮毛純白嚴寒坐
臥之處雪爲不積皆出諸夷山中

火浣布不朽木俱出于建昌夷中其布卽取此木之絲
而成焚之然而無灰炤過仍還故物

兔之白者自是一種安縣閒有攜至會城者予因憶向
年家食曾于沔州費兵憲處見有三小白鹿云自關
中攜歸身白而目紅儼如圖畫中所繪豈凡物皆有
白色特未之多見乎

鯢魚一名鮒一名鯈出滎經河中大首長尾而有四足能援樹攀木聲作兒啼土人皆食之

雪蛆產于岷峨深澗中積雪春夏不消而成者其形如蝟但無刺肥白長五六寸腹中惟水身能申縮取而食之須在旦夕否則化矣

香豬土犬建昌松潘俱出香豬小而肥肉頗香入冬醃以餽人土犬亦小而肥美羣遊稻田一犬登樹而望如有捕者則先鳴吠令眾犬奔逸

黃庭堅嘗謫涪州守因自號曰涪翁李白嘗避難過涪

州故今鎮名曰李渡

中巖諸詎那尊者道場離青神南五里寺臨江干有水月閣下更逼江水喚魚池在巖石下小魚百十頭僧拍手始集三石筍從地而起石逕高峻宛曲泉從兩山而下頗盡林壑之美

凌雲山與嘉州對岸石壁鐫千佛內彌勒像首攢峰頂趾齧江水高三百六十尺唐韋皋所造寺之殿閣磴道依山盤曲前望峨嵋三峰下俯眉雅諸水真江山輻輳處也寺左有蘇長公墨池著書堂長公云天下

山水在蜀蜀之山水在嘉嘉之山水在凌雲
蜀中水陸舟車所經凡有巖石莫不鐫佛像豈地近西
番前代風氣湔染如此

保甯郡治前對翠屏山江流環遶其下闐闐殷富北川
奧區也張桓侯墓卽在治旁廟宇巍峩郡人咸嚴事
之出郭而西經槐樹施店柏林圓山龍潭五驛始抵
廣元重岡複嶺道路縣邈行者苦之關曰二郎曰柏
曰梅皆極險峻擅登青天之譽

廣元卽利州古之葭萌也出郭數里石壁臨江鑄大小
佛像幾滿非近代物車馬遶岸而行下視深潭毛爲
之豎宛然又一巫峽也

廣元而西經河沙神宣黃墳三驛始出蜀境巖嶺斗削
四無人煙行者如臨絕境視之歸巫道路僅讓一籌
七盤嶺乃秦蜀分界處一峰插天萬石羅列中開一綫
之道而下俯絕淵誦岑嘉州杜工部之句不覺七盤
日月飛動

蜀中諸郡天氣不一重夔四面皆山城基少土冬雖不
寒夏則最熱六七月閒裸體終日曠曠如醉夢中夜

寢汗透枕簟惟錦城隆冬時或揮扇夏夜閒覆單衾
乃四時陰多晴少數郡皆同每誦子美蜀星陰見少
江雨夜間多感嘆此老信是詩史

松潘去省不旬日聞彼中最寒臥室之內冬必爨火重
裘盛夏一雨卽擁絮炙炭蓋近西北地氣使然
蜀江界兩山閒卽風亦無波舟且不篷奈何禍常不測
予目擊之始得其故蓋灘急水駛怪石林立舟薄而
載重長年每倩客爲之突然遇石鮮不齧粉是以絕
無顛覆惟有沈溺患生于頃刻無事時非如大江風

波可以閃避也誠能反是安得有虞

出師表五月渡瀘以水色黑得名今之金沙江是也滇
蜀之交一在武定之南一在姚安之左

學海類編 卷中 益部談資卷中 一 逸頁

[Faded bleed-through text from the reverse side of the page]

益部談資卷中

明 安陸何宇度仁仲著

成都一名錦城一名錦官城秦張儀所築有大城少城
子城三區後始改合附郭縣二曰成都曰華陽華陽
古國名也

成都城外皆平壤竹樹蒨蔚田地膏腴江河諸流交錯
貫絡昔稱天府沃野信非虛語

江從灌口來夏秋水漲闊盈里許冬春水涸如帶邦人
或以河名之

錦城又名芙蓉城昔蜀孟昶僭擬宮苑城上盡種芙蓉
謂左右曰真錦城也後世因之亦種芙蓉于上有直
指登城不便輿從命稍芟之軍卒因盡蒐去

東南角樓榜曰芙蓉樓名雖佳規製不甚鉅麗宴會亦
不恆到

西南角樓榜曰錦江春色俯視江河諸流青羊浣溪諸
處景物差勝

環城為橋者四曰駟馬即相如題柱處舊昇仙也南曰
萬里取孔明送費禕聘吳曰萬里之行始于此之義

東曰錦濯西曰浣花名皆古雅可誦

唐史載元宗狩蜀至萬里橋問橋名左右對以萬里元
宗歎曰開元末僧一行謂更二十年國有難朕當遠
遊至萬里之外此是也遂駐蹕成都

文翁禮殿今學宮即其故址云漢文翁立學作石室繪
三皇五帝仲尼七十二賢及兩漢君臣像于其中祀
之至唐已漫滅宋嘉祐中重為摹寫增至一百七十
三人今學宮止有孔門諸弟子石刻不知仍是故物
否其餘不可見矣因錄其姓名

盤古 伏羲 神農 蒼頡 沮誦 黃帝 少昊
高陽 祝融 高辛 堯 舜 禹 咎繇 稷
契 伯夷 夔 湯 伊尹 高宗 傅說 太
王 王季 太伯 文王 太顛 閔天 散宜生
南宮括 武王 太公 周公 成王 召公
仲山甫 宣王 管仲 子產 李冰 老子 蕭
何 張良 叔孫通 陸賈 漢文帝 賈誼 文
翁 漢武帝 董仲舒 公孫宏 倪寬 司馬相
如 王吉 蕭奮 勝戴 匡衡 王尊 李疆

莊君平 劉向 楊雄 漢光武 鄧禹 張堪
張湛 桓溫 劉平 鍾興 第五倫 廉范 班
固 黃昌 种暉 馬融 李膺 高鎮 陳寔
服虔 陳紀 鄭元 諸葛亮 龐統 董和 費
詩 譙周 鍾繇 王肅 羊祜 張華 杜預
王濬 夏侯湛 喬智明 范廣 謝安 桓石虔
蜀錦之名其來久矣城名錦官江名濯錦而蜀都賦云
具錦斐成濯色江波遊蜀記云成都有九壁村出美
錦歲充貢宋朝歲輸上供轉運給其費府掌其事元

豐中建錦院歲募軍匠五百人其錦之名凡三十餘種今惟蜀藩製之名無多而價甚昂不可易得蜀箋古已有名至唐而後盛至薛濤而後精據譜云箋之名不一有曰玉版曰表光曰貢余曰經屑或布紋或綾綺文或人物花木蟲魚鼎彝文唐韓浦詩云十樣鸞箋出益州寄來新自浣溪頭則又倍多于濤製更有小而僅可書一詩者乃今蜀藩所造僅純白一種清瑩光細長餘五六尺寬僅三二尺亦無諸花紋遠讓古昔多矣

十箋者曰深紅曰粉紅曰杏紅曰明黃曰深青曰淺青曰深綠曰淺綠曰銅綠曰淺雲又有松花金流沙彩霞金粉桃花冷金之別皆其異名

史載王衍以霞光箋五百幅賜金堂今張蠊霞光卽深紅箋也又有百韻箋以其幅長可寫百韻詩其次學士箋比百韻較短何今日輒無一種

漢昭烈帝惠陵去城南五里古冢巍然石碑僅未斷傍卽昭烈廟頗壯麗用武侯諸將配享前有穹碑以亭覆之乃唐之裴度記柳公綽書也會城古碑僅有此

子謂衢口當樹一坊名曰漢昭烈陵廟嘗請之當道未果

楊雄舊宅在府治西成都縣治其舊址也今藩司前有墨池草元亭在焉誦岑參詩吾悲子雲居冥寂人已去娟娟西江月猶照草元處爲之悵然宋米芾有墨池碑字

子雲家貧嗜酒問字者多載酒而往清賞錄載昔有犍爲人得雄草元之硯如今製但去圭角

王褒宅在資陽墓在資縣舊碑剝落不堪讀李白宅在

彰明聞有碑刻在焉

花藥夫人宅在灌縣夫人姓費氏青城人以賦宮詞百首著名全蜀藝文志仍載有遺詩百首是楊用修收者

嚴君平墓在新都有碑樹于道傍賣卜之肆在省城漢明帝諱莊故史記改莊爲嚴以莊與嚴古同義

武侯祠在城西浣花谿上與子美草堂相接廟貌雖未頽壞森森之柏則不復存

相如宅在城西南五里又云在市橋西今琴臺去城西

五里豈非其處乎秀柏參差當壚滌器風流宛可想見

傳謂相如死文君爲作誄是文君豈徒以色稱者

支機石在城西隅卽嚴真觀今以一亭覆之高不盈丈頑石無他奇晉張華博物志有人居海上乘槎到天河得一石歸以問嚴君平今蜀人相傳卽此

子美石筍行云在成都西門陌上按志有二株雙蹲一南一北南者高于北以公孫時嘗折也今徧問故老于西門外竟無有也豈後又盡被折去耶

城南市名五塊石有大石五片疊疊其上云石下有海眼豈卽石筍年久傾斷置此乎又云五丁所置下有海眼

青羊宮在城西南竹樹青葱殿宇宏麗宴會多往焉昔老聃謂關令尹喜曰後于青羊肆相尋卽此地

杜少陵勝國時加諡文貞祠在浣花溪上云卽草堂舊址人多以草堂呼之祠後堂匾陳方伯鑒書卽萬里橋西一草堂棟宇尙未傾圮蓋監司郡邑常宴會處予稍爲之修葺鑄公遺像及唐本傳于石榜署皆用

公詩而隲括之曰背郭堂成錦里溪山千古在綠江路熟青郊竹樹四時新又萬丈光芒信有文章驚海內千年豔慕猶勞車馬駐江干又萬里橋西草堂佳句如新宛見卜居之興百花潭上水檻蒼波依舊長畱懷古之思不知堪博此公捧腹否

浣花溪中一洲橫出下卽百花潭也舊有洲上亭一跨水橋亭一名皆無謂予易以浮槎滄浪二榜及增益竹樹于上子美有靈當亦稱快

武侯工部二祠之中有寺一名草堂一名中寺前代爲

尼居名桃花寺隋文帝時始易以僧大歷中崔甯鎮蜀以冀國夫人任氏本浣花女遂重修之繪任氏真于其中會昌中欲毀寺夜聞女子啼泣之聲中止已而禱雨有驗本朝賜名梵安寺

百花潭口舊有任氏一碑立于風雨中予令人滌去苔蘚讀之乃宋熙甯年間吳中復撰八分書也字半漫滅略可成誦知夫人微時見一僧墜污渠爲濯其衣百花湧出因而名其潭後杜少陵薛濤皆買居潭側薛濤唐之青樓人也其詩云聞道邊城苦于今到始知

好將塞下曲唱與隴頭兒濤本長安良家女父卒于蜀失身爲妓晚歲住居碧雞坊王建贈詩云萬里橋邊女校書枇杷花裏閉門居掃眉才子知多少管領春風總不如墓在江干碑題唐女校書薛宏度墓宏名度蓋濤小字云卒時年七十三段文昌爲撰志銘一時名士如韋皋李德裕元稹白居易裴度杜牧劉禹錫張祐咸與之唱和

薛濤井舊名玉女津在錦江南岸水極清澈石欄周環久屬蜀藩爲製箋處有堂室數楹令卒守之每年定

期命匠製紙用以爲入京表疏市無貿者

石犀寺俗稱曰石牛寺華陽國志云 年閒建今佛

殿之前有一大石其形如犀殿中又有水眼如井云其水與海通有太和年閒馬季武寫經石幢

射洪祠在北門外驛傍傳云蜀獻王初之國夢有神冠冕來謁者王問爲誰對曰陳子昂也今爲射洪土神王駕過護送至此王因其地立祠祀之世因謂子昂爲蜀土神

大慈寺唐至德年建舊有元宗書大聖慈寺四字寶光

寺卽故興福寺亦創自唐時惜皆無舊碑可考

東坡云古今畫水多作平遠細皺其善者不過能爲波頭起伏唐處士孫位始出新意盡水之變號稱神逸其後蜀人黃筌孫知微皆得其筆法嘗于大慈寺四壁作輸瀉跳蹙之勢洶洶若崩岸也知微死畫法中絕今大慈寺故在也四壁安能復覩

桐花鳳志稱成都春日桐花開時有鳥小而具五色如鳳形盤旋樹上桐花謝莫知所之問之郡人亦不多見

鸚鵡成都甚多梁山諸縣亦有之春時飛鳴如陣每過浣谿樹下停車側耳者久之

楊梅蜀藩夏日相餽亦鹽水浸者顆味俱讓吳下

酴醾花志載惟成都最佳予見三種曰白玉盃曰出爐銀曰雲南紅色香俱美可敵南中黃薔薇

牡丹諸色俱備千葉而大如毬兩都所不及也一名魚血紅者獨豔惟無黃者

山茶有雲南紅石榴紅謝萬定數種朶大勝芍藥重瓣如芙蓉土人自能接他處所莫匹也寶珠雖有又拜

下風矣

素馨紅者白者俱奇品紅開于春白開于秋桂之丹者色亦甲于南中茉莉枝如藤花瓣稍大山蘭四季有花香氣襲人又有一種葉稍大紅黃白三色而窮冬新正盛開名曰蟬花則尤異也

賽蘭香葉如菀豆開花似粟香亦清遠此中人甚愛重然云蘭爲所賽似未必然楊用修伊蘭賦謂不足于豔而有餘于香載之鬢紛經句猶馨古人用紉佩類浴西番有伊蒲佛供卽是此花

郫筒酒乃郫人剝大竹爲筒貯春釀于中相山濤治傳郫用筠管釀醪醪作酒經旬方開香聞百步今其製不傳

橙木籠竹惟成都最多江干村畔蒼蔚可愛每見必誦杜甫礙月吟風之句第橙字音欺不見字書

金馬碧雞祠在北門內金馬坊側漢宣帝聞益州有金馬碧雞之神遣諫議大夫王褒醮祭此宋賜廟額曰昭應今仍稱金馬云

蠶叢祠在府治西南蠶叢初爲蜀侯後稱王教民桑蠶

蜀人至今德之

八蜡祠在城東南隅有司春秋致祭八蜡神者先穡先農司穡郵表啜貓虎坊水庸也

宋景濂國初仕學士致政歸青蘿山因其孫以罪被刑安置公茂州子瓚隨侍之蜀閒關萬里卒于夔門瓚與家人皆相繼而歿蜀獻王憐之移葬于成都之東郊卽今之淨居寺也祠廟宏整有司歲舉祀焉其遺裔尙有存者方孝孺嘗應蜀藩聘至因竝立祠于左仙宮佛院成都頗盛半創自獻王之國時累代藩封中

貴從而增益之殿宇廊廡華麗高敞觀如元天雲臺

寺如昭覺金像淨居淨因

俗名福萬

金沙廟如昭烈宮如

青羊俱不減兩都規模足供遊眺

諸寺閒藏有佛牙甚至重七斤餘者錦袂宋匣珍襲嚴祀余頗疑之偶檢本草豹之齒骨極堅人得之詐爲佛牙以誑俗爲之爽然自失此可以一洗蜀僧之陋楊用修著述之富古今罕儔予所見已刻者二十九種升庵全集升庵詩集升庵詩話楊子卮言赤牘清裁詞林萬選丹鉛要錄丹鉛總錄丹鉛摘錄丹鉛餘錄

丹鉛續錄藝林伐山墨池瑣錄詩話補遺五言律祖
絕句辨體禪林鉤元水經古文韻語轉註古音略古
音駢字古奇複字古音附錄異魚圖贊韻林原訓李
詩選杜詩選風雅遺編皇明詩抄未見已刻者三十
九種南中續集玉堂集長短句長短句續集書品詞
品金石古文畫跋赤牘拾遺選詩外編選詩拾遺唐
絕精選唐音百絕唐絕增奇六言詩選古文音釋古
音獵要古音叢目奇字韻古文參同契溫泉詩集洞
天元紀檀弓叢訓禪藻集譚苑醍醐陶情樂府樂府

續集筌篔新詠堦戶錄滇載記脈位圖說連夜吟卷
月節詞千里面談經義模範崔氏志銘山海經補註
七十行戍藁聞未刻者尙有七十一種各史要語晉
史精語夏小正解管子敘錄莊子刊誤古雋謝華啓
秀羣書麗句文海釣鼈名奏箐英四詩表證古文韻
語別錄古文詩選皇明詩續抄詩林振秀五言絕選
選唐百絕寰中秀句古今柳詩古諺古今風謠蒼珮
紀遊填詞選格百琲明珠詞苑增奇草堂詩餘補遺
六書傳證六書探頤篆韻索隱古篆要略六書統摘

要錄駢銘心神品韻藻晞錢瓴筆清暑錄希姓錄滇
程紀書畫名跋書畫神品目素問糾略羣豔傳神江
花品藻滇候記引書晶托丹鉛別錄丹鉛閨錄丹鉛
贅錄升庵經說文遊餘錄卮言閨錄敵帚病榻手吹
蘇黃詩髓宛陵六一詩選五言三韻詩選五言別選
宋詩選元詩選羣公四六節文古韻詩略說文先訓
古今詞英填詞玉屑六書練證逸古編經書指要唐
史要偶語六書索隱總之一百四十種

用修之夫人能詩其一律一詞已載之王元美藝苑卮

言矣今從伊里人更得數首曰珠淚紛紛滴硯池斷
腸忍寫斷腸詩自從那日同攜手直到而今懶畫眉
無藥可療長夜恨有錢難買少年時殷勤囑付春山
鳥早向江南勸客歸又懶把音書寄日邊別離經歲
又經年郎君自是無歸意何處春山不杜鵑又丈夫
本是四方客妾爲離愁心似結公義私情不兩全願
君早向凌煙勒又聞道滇南花草鮮輸君日日醉花
前銀河若得鳩毛渡竝駕仙舟聽採蓮又纔經賞月
時又是菊花期歲月看流水人生遠別離

武侯祠壁閒嵌小碑上鐫繪像衣冠甚古雅題云丁黼
字文伯石埭人也宋嘉定初進士有詩名以忤史彌
遠出帥成都賦錢入國詩曰正是朔風吹雪初行滕
結束問征途不能刺刺對婢子已是昂昂真丈夫常
惠舊曾隨屬國烏孫今亦病匈奴不知漢節歸何日
準擬殷勤說汴都元人入蜀公不屈死之事聞詔謚
恭愍賜廟號溪有司春秋致祀字畫遒逸可愛立此
石者名吳本義不知何許人

長樂花枝葉皆如虎耳草秋後叢生益益開開紫色小

花冬末轉盛鮮麗可愛居人獻歲以此爲餽名曰時
花

任氏墓碑予嘗搜之荆棘中近見稗史載任氏者唐之
尚書侯繼圖妻也侯讀書大慈寺因秋風起拾得一
桐葉有詩在上貯之匣中後數年方卜任氏爲妻任
見而驚曰此妾書葉詩胡爲在君手詩曰拭翠斂娥
眉鬱鬱心中事擗管下庭除書成相思字此字不書
石此字不書紙書在桐葉上願遂秋風起天下有心
人盡解相思死天下負心人不識相思字有心與負

心不知落何地

益部談資卷下

明 安陸何宇度仁仲著

蜀道難自古記之梁簡文帝詩云巫山七百里巴水紆
 回曲為川東舟行峽中作也李白詩云不與秦塞通
 雲烟為川北棧道作也大都蜀道無不難如上青天
 者峽固險矣而陸亦匪夷如夷陵至巴東之陸程則
 視棧道何異是其難又在楚不在蜀耳
 過巴東一日始抵蜀界沿江而行險覺稍減巫山十二
 峰從與人指點微見一二遠插天外

楚入蜀縣首爲巫山倚山俯江官民高下而居江口有神女廟荒蕪不治乃有司新移置者舊廟在江干離縣十里聞亦頽廢予令人蹋古碑無有也宋玉高唐賦想隨襄王之夢逝矣

楚宮僅存遺址在巫山西北楚襄王所遊之地也黃山谷楚宮詩刻所謂細腰宮卽此今竟覓不可得

巫峽卽巫山也與西陵峽歸州峽竝稱三峽連山七百里非亭午夜分不見日月水經云杜宇所鑿以通江水圖經云抗峰岷峨偕嶺衡岳凝結翼附竝出青雲

盛宏之荊州記云三峽中兩岸連山略無闕處重巖疊嶂隱天蔽日杜修可峽程記云三峽謂明月峽巫山峽廣澤峽其瞿塘灩澦之類不係三峽數

趙文敏手書十二巫峰詞昔刻于巫山縣令尹厭其來索之煩麾去予僅于士夫家見之

陽臺在巫山城內山頂山不甚高臺正平坻荒烟野草襄王神女不知何在

三峽猿聲古人題詠極富予未舟行不及聞訊之馬元赤云峽中兩岸最多或三五爲偶或百數十爲羣沿

崖援樹不可勝數惟亦未聞啼聲

竹枝歌唐劉禹錫白居易皆嘗賦之凄婉悲怨蘇長公云有楚人哀屈弔賈之遺聲焉鶴林玉露載宋時三峽長年猶能歌之今則亡矣

夔卽古夔子國宋王梅溪舊治也四圍皆高山峻嶺中橫江流一對江之山左爲赤甲右爲白鹽

巫山女子皆善吹簫嫁時眾女子治具送之吹簫數日爲樂蜀中有此母乃神女之遺風乎

魚復卽夔地謂鯨魚至此復回不上也對城隔江有魚

復縣故址

白帝城離夔東五里崇山巍然另作一城狀下卽西陵峽口大江橫流瀟騰澎湃真楚蜀咽喉也本朝設右所官兵守焉

城上舊建公孫述廟後改漢先帝廟以武侯關張配享綽楔題曰漢代明良廟後復有僧寺一區宋陸務觀記云有古松柏及孟蜀時碑與黃庭堅題石筍越公堂俱無一存自關而東卽子美東屯故居矣

瞿塘卽峽內江水深沈處灩澦乃一石筍樹兩峽之中

學海類編 卷之三
遊覽
若青螺寶劍插于鏡中波面上下之險信無逾此俱
在白帝城下

灩澦大如象瞿塘不可上灩澦大如馬瞿峽不可下又
云灩澦大如襍瞿塘不可觸舟人以為水候總之夏
秋不可行也

峽口鐵柱二不知是何代物上鑄守關大將軍徐宗武
等字

峽口石上字多磨滅惟一詩云白帝城邊春草生黃牛
峽裏水波清追思昭烈千年事長使英雄氣不平後

書大元至元十九年歲次壬午鎮國上將軍四川宣
慰使何公同男到此吟而已

諸葛八陣磧在夔城者江沙上碎石行列如引繩春冬
時見夏秋没于水然江漲即浮磧上數十丈比退而
陣石如故子美詩有江流石不轉之句

夔城無井官府軍民咸取汲于江雖治井亦不能貯水
府治後僅有一泉自山巔流下四時不竭因而引入
治內鑿池以貯之亦不能多分別派

夔蓋蜀東門戶然登後山城中不一覽殆盡前即逼近

江流域內薪水皆仰給城外不知前人何以爲守
夔郡縣皆屬蜀而衛名瞿塘則屬楚國朝犬牙之製如
此

白帝城上僅元人一碑亦不甚佳餘皆今人詩字

杜工部祠在郡東數里倚山俯江云亦新創祠中止塑
像其秋興八詩近代雖有刻字殊不佳餘無足觀者
子置碑二一刻公像及史傳樹祠中一大書唐杜工
部遊寓處樹道旁

工部舊日草堂在城東十餘里外尙有遺址可尋止一

碑存數字題重修東屯草堂記似亦元物

城西開元寺唐了休禪師道場也國初張三丰與僧廣
海善寓于寺者七日臨別贈詩云深入浮屠斷世情
奢摩他行恰相應天花隱隱呈微瑞風葉琅琅詠大
乘密室晝閒雲作蓋空亭夜靜月爲燈魂銷影散無
何有到此誰能見老僧竝畱草履一雙沈香三片而
去後海以詩及二物獻之

文皇答賜玉環一枚千佛袈裟一領今猶置寺中稱世
寶云解學士縉有寺中法堂記碑

學海類編 卷之五 遊覽
先主永安宮遺址卽今之學宮先主所崩處也諸葛武侯受遺命于此

甘夫人墓在府治內後山前有二碑字似被近世更改吏卒皆能指點道之

子美遊蜀凡八稔自大歷元年春至夔大歷三年去而之楚寓夔之東屯西灤者凡三年得詩四百餘首灤者土人謂山閒通江之流曰灤

夔譙樓上柱聯卽當用杜詩五更鼓角聲悲壯三峽星河動影搖何等壯麗俗人因諱悲字置之

志稱有詩史堂刻杜工部遺像又有萬丈堂取光焰萬丈之義俱在府治內今不可考

郡齋望隔江羣山尺咫七峰分列若屏朝暮之閒翠色撲人衣袂予因取杜句翠屏名署中小齋

夔之香櫟大而香爲閩浙所無亦有獅頭柑佛手柑皆可玩

雲陽縣卽古雲安也酒未見佳纔傾一盞卽薰人之句每過高誦數迴

雲陽對江山上有張桓侯廟香火頗盛傳云侯之首葬

此官舟過縣必設牲醴望祀之

萬縣本漢胸臆縣地隔江有岑公洞寬敞如庭室中有石狀如芝儼人爲者壁上多前代題識洞前石碑林立惟黃山谷楷書一通學顏體甚佳岑公唐人也爲仙化去

出城渡河有巨石亘生水而呼曰天生橋又曰天仙橋石橫百丈寬數十丈平坦如削下有飛瀑崩騰如萬馬之聲過之毛豎予語越尹當建二坊標其勝尙未就

丙穴在達州出嘉魚杜工部詩云魚知丙穴由來美是也志又載雅州亦有丙穴

梁山亦漢胸臆縣地東九十里有泉自山頂下注東坡昔以飛練名其亭嘉靖閒守臣獻白兔至此而斃瘞之因更建亭宇故今稱之曰白兔亭行山路旣疲坐聽飛泉百丈十里聲不絕誠長途一快事勝覽也又聞山上有洞惜未及登

黃葛樹葉似桂稍大團欒蔭數畝冬春不凋榦則臃腫根皆蟠露土上至于石崖之側則全似不藉土生者

夔之梁萬最多惜無材用


竹籟太平東鄉皆有之生于竹中之鼠也形色俱類鼠
差大而肥烹之味與黃鼠無異

郭公棐嘗梓夔門三傳名宦則諸葛亮李靖源乾曜韋
處厚唐介虞允文王十朋李浩查籥劉光祖余應求
孟琪鄉賢則屈原李遠廖彥正楊晨袁沔青文勝汪
瀚柳英流寓則宋玉杜甫李白寇準張俞邵雍黃魯
直宋濂惟武侯工部王梅溪有特祠祀之

何仁仲辭賦之業士林聲稱籍甚而不悉其有政事
材浮沈兩都散署十許年僅得判夔府當事者一切
盤錯輒屬仁仲應時批解飭簞篋而遠苞苴人皆嚴
重之居夔僅數月督府置諸幕下使佐成都守攝華
陽令其最不易辦者爲貢筆仁仲費省而事集兩臺
及監司予上考而銓曹漫然用左官律監之余使使
訊仁仲仲遺一編書曰益部談資君望我意氣乎臺
中裝畫是矣余發視之則皆蜀故實山川人物之勝
瞭然指掌應接不暇而時吐致語靡靡可聽余調仁

仲不聞沈休文之戲朱彥和耶年少何乃不廉天下
唯文義某書一時將去仁仲以詞客兼吏事名是為
妬媒宦蜀三年遂括蜀千古之美英英斑管纍纍錦
囊又何得不左官人傳仁仲入都面詰銓曹左官坐
何狀曰不當以辭翰內交仁仲言能為辭翰者內交
我耳非我交人曰貲郎何必辭翰仁仲失笑此自蜀
人司馬長卿作俑夫以辭翰內交孰與以賄信如所
云長安輦上貴人必不識一丁者耶長揖而出此語
殊可為談資附之以資談者南新市人李維禎本甯

甫譏



泉南雜志卷上

明 樵李陳懋仁無功著

泉州有浯江郡志云晉南渡時衣冠士族避地於此故
 又名晉江余謂江既以晉得名何當時人文遺事無
 一可稱豈簡冊逸而無徵即避地事亦傳聞耶晉書
 地理志武帝太康三年置晉安郡統八縣晉安一也
 然則武帝已舉晉名其縣或不待元帝在建業而始
 以晉名其江也載記符堅封慕容垂泉州侯此泉州
 乃漢昭帝改燕國為廣陽郡統縣十之一今畿輔潮

縣地非閩之泉州也閩泉乃隋文帝以豐州改今晉江則唐元宗以南安分置

泉之人文全唐貞元中始得歐陽公詹按唐書公與韓文公李觀李絳崔羣王涯馮宿庾承宣聯第皆天下選時稱龍虎榜是科知貢舉陸宣公也自公之後名賢繩繩逮我明文章德業之盛不特凌往代已也

萬安橋乃宋蔡忠惠公所造世謂洛陽橋是也落成公自爲記曰泉州萬安渡石橋始造於皇祐五年四月庚寅以嘉祐四年十二月辛未訖功繫址於淵醜水

爲四十七道梁空以行其長三千六百尺廣丈有五尺翼以扶欄如其長之數而兩之糜金錢一千四百萬求諸施者渡實支海去舟而徒易危而安民莫不利職其事者盧錫王實許忠浮圖義波宗善等十有五人旣成太守莆陽蔡襄爲之合樂讌飲而落之明年秋蒙召還京道繇是出因記所作勒於岸左公自書大方尺分勒二石今在公祠蓋公之功在百世大矣而記僅一百五十二言可見古人不肯擅美如此又聞之父老云先時二石爲倭載去後見江閒發光

探之得後一石其前一石乃後人復模故前石不如後石之瑩潤打碑聲時與江濤競響也俗傳公造此橋限以濤勢不能繫址乃檄江神得一醋字公云廿一日酉時爲之今公記中無是說也王遵巖曰豈其駕長江之洪流馮虛以構實其役有足駭人者昧者驚焉而言之異亦以賢者之所爲興事起利人樂其成而賴其功故托於神以美之耶又宋釋太初謂前記多三字至今傳其言也

盤光橋自洛陽橋東接鳳嶼嶼在江中央上多腴田稠

民居舊有石路潮落路出行者病之宋寶祐中僧道詢募貲作石橋長四十餘丈廣一丈六尺比蔡端明所造洛陽橋長多四十餘尺闊多一尺世知洛陽而不知盤光者蓋以人重也雖然貴賤異等若道詢一行腳耳無藉勢位而功力過之則其名胡可泯泯且洛陽橋尙有百五十三字之記此獨無之意當時道詢不欲居其功以垂後名耶抑本有記而歲遠湮廢也

淳化閣帖十卷宋季南狩遺於泉州已而石刻湮地中

久之時出光怪樞馬驚怖發之卽是帖也故泉人名其帖曰馬蹄真跡余按沈源釋文序云是帖納郡庠歲遠剝蝕其後莊少師氏復摹以傳則今帖非馬蹄真跡乃莊氏摹刻也其石先屬張氏後以其半質錢於族祕匿不返至於構訟於是各翻木刻足之分爲兩部今所傳者旣非宋遺而莊模亦皆割裂遞更遞失矣惟蔡沙塘憲副家所藏七塊完好不剝蔡甚寶之甚爲難得欲得莊刻之全與蔡之所藏必求數家而合之然不易也又按沈源所云莊少師者不知何

名攷泉郡志有莊夏者登淳熙八年進士歷官侍郎封永春縣開國男卒贈少師有文名他莊無仕少師者故知是帖復摹乃莊夏也

泉州察院堂左有宋太宗戒石銘碑乃黃山谷作擘窠大書其下有高宗行書跋語云近得黃庭堅所書太宗皇帝御製戒石銘恭味旨意是使民于今不厭宋德也因思朕異時所歷郡縣其戒石多置欄檻植以草花爲守爲令者鮮有知戒石之所謂也可令摹勒庭堅所書頒降天下非惟刻諸庭石且令置之座右

學海類編 卷之四
爲晨夕之念豈曰小補之哉跋後有一伍字乃高宗御押也又其下有小楷書呂頤浩題疏云臣等竊惟太祖皇帝武定天下而太宗皇帝文以撫之是時□□□□民赤子新去湯火哀矜□乃發大訓垂諸庭石如雲漢在天爲光昭回其施在下則爲露爲雨民涵斯澤豈其有極而吏更歲久或不知誦斯文矣皇帝撥亂安民規撫祖宗乃六月癸巳詔以黃庭堅所書刻之石將以墨本賜天下使日見而知戒焉嗚呼此盛德大業之本豈特讀正觀政要而太息哉臣

等材駑不足以佐萬分而知贊且勵蓋不獨郡邑之吏洗然於茲賜也謹昧死書於左方紹興二年七月癸酉端明殿學士左朝議大夫簽書樞密院事權參知政事臣權邦彥左通議大夫參知政事福建江南西路荆湖南北路宣撫使臣孟庾左通奉大夫守尙書右僕射同中書門下平章事兼知樞密院事臣□□特進尙書左僕射同中書門下平章事兼知樞密院事都督江淮荆浙諸軍事臣呂頤□謹題按是銘非太宗御製也四川通志孟昶著官箴云朕念赤子

旰食宵衣託之令長撫養安綏政在三異道在五絲
驅雞爲理留犢爲規寬猛得所風俗可移無令侵削
無使瘡痍下民易虐上天難欺賦輿是切軍國是資
朕之爵賞固不逾時爾俸爾祿民膏民脂爲民父母
罔不仁慈勉爾爲戒體朕深思太宗第取下民易虐
上天難欺爾俸爾祿民膏民脂四句移後二句居前
以爲銘便自簡當意完而無累澀之氣

又有高宗御書籍田碑云朕惟兵興已來田畝多荒故
不憚卑躬與民休息今疆場罷警流徙復業朕親耕

藉田以先黎庶三推復進勞賜耆老嘉與世俗躋於
富厚昔漢文帝頻年下詔首推農事之本至於上下
給足減免田租光于史冊朕心庶幾焉咨爾中外當
體至懷故茲詔諭想宜知悉其下有小楷書牒云泉
州紹興十六年九月十九日準行在尙書禮部符準
屯田關四月八日準紹興十六年四月六日敕中書
門下省臣寮劄子奏欲望聖慈勅令郡邑以近降御
筆藉田手詔模刻立石於聽事所如戒石之銘俾朝
夕省觀罔敢墜失庶有以廣聖志承天庥蒙屢豐年

與嗣歲之應天下幸甚取進止四月六日三省同奉
聖旨依奏牒州施行本州今恭奉聖旨摹刻立石于
聽事所者紹興十七年三月□日立左從政郎司法
參軍權察推臣曾汪右從事郎節度推官臣余麟右
承議郎簽書節度判官廳公事賜緋魚袋臣方周弼
右承議郎添差通判軍州主管學事兼管內勸農事
借緋魚袋臣王鑄右承議郎通判軍州主管學事兼
管內勸農事賜緋魚袋臣韓習左朝散大夫知軍州
事主管學事兼管內勸農使賜紫金魚袋臣陳康伯

此碑在戒石銘碑之右石俱精瑩煜煜有神氣

衛西榕樹幹大如一間屋枝上有纒纒垂下者謂是根
也其高參天枝葉蔭可三十餘丈相傳韓少卿國華
爲郡誕魏公日樹杪爲吐烟靄又云榕樹千年者其
上生伽柑香

德化縣白瓷卽今市中博山佛像之類是也其坏土產
程寺後山中穴而伐之綆而出之碓極細滑淘去石
渣飛澄數過傾石井中以漉其水乃塼填爲器石爲
洪鈞足推而轉之薄則苦窳厚則綻裂土性然也初

似貴今流播多不甚重矣或謂開窠時其下多藏白
瓷恐傷地脈復掩之

閩之遠海近番處有燕名金絲者首尾似燕而甚小毛
如金絲臨卵育子時羣飛近汐沙泥有石處啄蠶螺
食有詢海商聞之土番云蠶螺背上肉有兩筋如楓
蠶絲堅潔而白食之可補虛損已勞痢故此燕食之
肉化而筋不化并津液嘔出結爲小窩附石上久之
與小雛鼓翼而飛海人依時拾之故曰燕窩也

泉郡荔枝雖鬱爲林麓然不若福興兩郡之盛絳囊翠

葉明秀可愛蔡端明所謂殼薄而平瓢厚而瑩膜如
桃花紅核如丁香母剝之凝如水精食之消如絳雪

誠哉荔枝譜四種垂五百餘年品目雖存漫不可據今

惟五月熟者曰火山肉薄而酸六月熟者曰早紅曰
桂林曰白密曰狀元紅曰金鍾俱稱佳品七月熟者
味甘酸曰山荔枝蠲渴補髓多啖無傷韓偓荔枝詩
云封開玉籠雞冠溼葉襯金盤鶴頂鮮想得佳人微
啓齒翠釵先取一雙懸又巧裁霞片裏神漿崖蜜天
然有異香應是仙人金掌露結成冰液蒨羅囊可謂

形容之妙矣蔡端明曰荔枝之於天下惟閩粵南粵
巴蜀有之漢初南粵王尉佗以之備方物於是始通
中國司馬相如賦上林云荅還離支蓋夸言之無有
是也東京交阯七郡貢生荔支十里一置五里一候
晝夜奔騰有毒蟲猛獸之害臨武長唐羌上書言狀
和帝詔太官省之魏文帝有西域蒲陶之比世譏其
繆論豈當時南北斷隔所擬出於傳聞耶唐天寶中
妃子尤愛嗜涪州歲命驛致時之詞人多所稱詠張
九齡賦之以託意白居易刺忠州既形於詩又圖而

序之雖髣髴顏色而甘滋之勝莫能著也洛陽取於
嶺南長安來於巴蜀雖曰鮮獻而傳置之速腐爛之
餘色香味之存者亡幾矣是生荔枝中國未始見之
也九齡居易雖見新實驗今之廣南州郡與夔梓之
閒所出大率早熟肌肉薄而味甘酸其精好者僅比
東閩之下等是二人者亦未始遇夫真荔枝者也閩
中惟四郡有之福州最多而興化軍最爲奇特泉漳
時亦知名列品雖高而寂寥無紀將尤異之物昔所
未有乎蓋亦有之而未始遇乎人也予家莆陽再臨

學海類編 卷之三
泉福二郡十年往還道由鄉國每得其尤者命工寫
生萃集既多因而題目以爲倡始夫以一木之實生
於海瀕巖險之遠而能名徹上京外被夷狄重於當
世是亦有足貴者其於果品卓然第一然性畏高寒
不堪移殖而又道里遼絕曾不得班於盧橘江橙之
右少發光采此所以爲之嘆惜而不可不述也
荔枝才已龍眼始行殼黃瓢白核壯肉薄本草謂之荔
枝奴信然蓋荔枝飽啖之餘不堪咀嚼如膏梁子居
常醲臙一旦家落舖薄糜使不適口

紅柑福橘之次者也橄欖青澀能消酒止渴藥性賦所
謂泉州橄欖能消酒是矣本草一名諫果謂其始苦
澀而回甘猶忠言逆耳世亂乃思之也其俗取與子
薑和核搗碎醋拌充蔬

甘蔗幹小而長居民磨以煮糖泛海售焉其地爲稻利
薄蔗利厚往往有改稻田種蔗者故稻米益乏皆仰
給於浙直海販莅茲土者當設法禁之驟似不情惠
後甚溥

清源山茶青翠芳馨超軼天池之上南安縣英山茶精

者可亞虎邱惜所產不若清源之多也閩地氣暖桃李冬花故茶較吳中差早

紅梅百葉一花三子曰品字梅紫梗疏條非復霜皮鐵幹可偶

芙蓉有產於山者余解後手插一枝未半載扶疏出牆名曰木芙蓉花最繁盛不下數百大如甌其色有朝紅暮白者此則粉紅一色耳

九節蘭花易植不若吳中所欽靜字中雖若棋列亦不甚香

余解東所植茉莉其高及檐嘗於暑夜設木榻坐其下清芬郁烈可沾眉髮其地易生如吳中插槿也按本草時珍曰嵇含草木狀作末利洛陽名園記作抹厲佛經作末利王龜齡集作沒利洪邁集作末麗蓋末利本番語無正字隨人意會而已末利原出波斯國移植南海其性畏寒不宜中土弱莖繁枝綠葉團尖初夏開小白花重瓣無蕊花皆夜開丹鉛總錄曰晉書都人簪柰花卽今末利花也

西施舌殼似蛤而長外色若水蚌殼內色如孔翠肉白

學海類編 卷之三
似乳形酷肖舌闊約大指長及二寸味極鮮美無可與方舌本有數肉條如鬚然是其飲處

北方謂泥磚曰土坯晉江有介屬亦曰土坯綠殼白尾其旁有毛

草魚清脢頗險諸肴然其形酷似病痘小兒臂指所切不堪寓目

龍蝨如牛糞上蟲似黑而薄劈食之小有風味

鱉魚碧血海中介魚也似蟹足十有二長六七寸漁者醢其肉居人以其殼作水杓穆天子傳黑羊白血以

鱉况之則亦可信

蝦有長一二尺者名龍蝦肉實有味人家空其殼如船燈挂佛前

鬪魚大如指長二三寸花身紅尾善鬪人家豎畜之俗呼爲丁斑魚張世南遊宦紀聞云三山溪中產小魚里中兒豢之角勝爲博戲信然

牡蠣麗石而生肉各爲房剖房取肉故曰蠣房泉無石灰燒蠣爲之堅白細膩經久不脫

蚶大而肥鮮美特異海物志名天鬻爾雅名魁陸本草

名瓦壘子雜俎云鼎俎之味有蚶醬

鼃一名石鱗魚紫斑如纈錦生溪澗高潔處其大如雞
得亦不易厥俗兼皮食之有見餉者余令人縱之野
中左右瞪眸不轉曰此難得之珍味也

泉州海錯品類最多余嘗欲就其所見記錄一帙以廣
好事會奔命未遑也五代陳致雍作記謂雍家於晉
安日觀海族日有多品而考其名實不同者則華人
之言異也是故荒餘之產職方不入郭璞未詳張華
不載沈瑩臨海記顏之推稽聖賦崔豹古今註交州

異物記嶺表錄異山海經東方異物等記及諸家博
物之例物同而名異者集在此卷就其方言而正之
曰海物異名記

泉南富家田不過五頃至十頃極矣爲山多而巨姓繁
耳土人藏穀不藏米爲易蛀也又米多石屑米戶應
官簸賜數四非經旬不得甚而婦女手擇之余每齧
石屑則默然勿令知不欲難其所難也

造白沙糖法用甘蔗汁煮黑糖烹煉成白劈鴨卵攪之
使渣滓上浮按老學庵筆記云聞人茂德言沙糖中

國本無之唐太宗時外國貢至問其使人此何物
云甘蔗煎用其法煎成外國等自此中國方有沙糖
茂德乃宋勅局勘定官余郡人也

蟻有數種能螫人廚中饌案以四木桶盛水灌案腳於
中夏雨夜入臥牀雖帷帳周密俱所不免多至一二
升最為寢食之害蓋蟻為溼熱相蒸所致故居宇須
疏風放水稍亦可除蟻尤能運土蝕木令棟易撓

二宮告成需石陳設滇中以奇石四十八塊
皆佳名標奇以進時歲己亥三月余給事水衡目覽

手抄附列篇左

春雲出谷 泰山喬嶽 神龍雲雨 天地交泰

各大小五 玉韞山光 大五 河洛獻瑞 元嶂雲收

尺一寸 江漢朝宗 奇峰疊出 海山朝旭 各大小四 錦

雲碧漢 虹臨華渚 雪溪春水 羣峰獻秀 麟

趾呈祥 龍翔鳳舞 各大小四 一碧萬頃 雪巖春

霽 雲霞海曙 各大小三 萬山春曉 春山烟雨 百

川霖雨 各大小三 溪山烟靄 大 壽山福海

雲漢麗天 各大小三 湖光山色 函關紫氣 春山

烟雨 卿雲絢彩 雲霞海曙 雲霞出海各三尺五分

龍飛碧漢各八寸 山水人物屏石八塊 山川

出雲各三尺九寸五分 烟波春曉大三尺四寸 白雪春融大三尺

雲龍出海 槎泛斗牛各三尺五寸 春雲出谷

海晏河清 振衣千仞各九尺九寸

太守東山張公檄余盤德化縣倉穀盤少正額一千八百一石查出不入冊穀價銀二百九十三兩五錢又

司李李公檄余盤府倉穀盤少正額四百九十八石

夫各處倉穀缺額者多矣查盤止取倉收文具耳未

有倒厥籌較報欠數多如今日者有之百兩公所命

而余實始之蓋泉庾所儲晚稻也多擊則穀破少擊

則芒畱兩者皆可引蛀况漸以積之最易為末倉蠹

藉口甚有慢漁安得出陳易貯早稻使民髓不為消

竭也

東山公莅泉甫五月以簡惠得民心去郡日號泣遮畱

者數千人徒步會城乞畱不遂於是有吏欲自潤假

公旨令余追未完贖緩補庫余疑非公密白之公公

駭曰貧百姓愛我如此我反累之耶微公余言幾為

泉南雜志卷上

泉南雜志卷上

泉南雜志卷上

泉南雜志卷上

泉南雜志卷上

學海類編 卷之三
遊覽
奸吏所蔽公亟示蠲之

泉俗最重堪輿雖以己地營葬鄰家必嚴不相容一日有宦裔黃生乞地於東山公公以其狀屬余曰黃司農昔在南曹司帑棄千金而不取致死無以爲殮今親歸四年猶貧無葬地清官安可爲乎所乞二山果閒曠或天畀以埋玉未可知也該司躬莅一勘庶賢大夫有馬鬣亦有司表墓之遺思也余往勘所乞之山緊迫三墳適當其土三氏子孫所必爭非寢邱可比且巖阿峻折靈輿有崎嶇之危若臨穴鬪沮英魄

虛入上之安要須無繞始利窀穸公然余言黃亦亟止少焉三氏之族百許人轟闐余解余出成案視之乃謝而退

泉之東門外有官山周數里爲貧家葬瓦棺處葬如棋布無著腳地然而科第標木森立其閒者往往有之此豈當時重堪輿邀地脈者耶良由祖父無產可營於德無損子孫憑藉雖少外慕自絕惟知讀書自立故耳又聞之巨室至十餘年未葬其親者以爲難得善地既葬而子孫日見式微此豈當時不重堪輿不

邀地脈者耶亦由祖父居積豐饒豆瓜自種子孫多財益過不復好修外釁相仍故耳余故曰能盡天理則地脈可邀泉山之標作善之報也

安溪縣伐一巨木充冊封琉球海船桅木藩臬檄余覆勘其責甚重余以民尺量長十丈一尺六寸頭圍一丈一尺至八丈五尺處圍三尺七寸九丈處圍二尺九寸復以官尺較定若於內斲去浮皮爲數益窄蓋桅尾不及三尺而望斗之下必連鑿數孔以繫桅挂風帆緯繚所繫甚重不知幾千鈞能任與否請從定

式已而聞用甯化一木其必大於此者先是安溪山中出一大木運至漳界一磕而斷余意必病木木理不堅致之耳不然千年巨材豈一磕可斷天若不令苟全于陸以貽危海上也者國命非常故木神効職如此

泉城火燭盛行市販苦于資養向緣法不究弊雖禁弗戢當事者謂坐擧須臾而不知燭銀在鑪炙手難獲適生搶奪厲階耳余乃辨傾紋傾燭兩種瓷罐迥然各異傾紋銀者直出鏽色而乾傾燭銀者光潤帶黃

而溼取罐比查好可立見議出而人芟機種積尙頗
革火燭也
假銀也

鷺鷥洲田本海沙漲出因莖戶欺隱沒爲學田民佃輸
賦以資膏燭頗爲有力所侵幾致激變監司檄余監
穫以綏農人因思不日歸耕如淵明于下澗田舍穫
釋鑿詠歌脩然自適無復作風塵面目看人肩頰也
德化九仙山有瀑布泉自雲際下宋主簿柳驥詩有天
插一泉聲漱玉池高六月夜凝霜之句

余解西甚饒隙地綜事之暇蓬首散帶率童僕種蔬於

中所茹有餘尙可分給貧隸息力樹下見清源山縈
烟斜照中如湘中別記所謂碧紗籠罩翠微蔚爲佳
境因念我家仲子攜妻灌園陶淵明採菊東籬下悠
然見南山時於此俱可想見顧余事官鞅掌委形踟
躑然而時得二趣者聊欲覓閒情於勞鹿簡清事於
塵汙耳

清源山在郡北三里許高數千仞未至絕巘數百武有
南泉白石罅流出積於砥石凹處甘冽獨勝他泉好事
者攀躋汲之冬夏不減其東有妙覺巖石上刻第一

山是米元章行書
南臺峭拔摩空在清源山之右臺南有砥石嘉靖十三年譚鎧以鄉舉司李泉州建思樂亭於其上鎧有惠政善聲律樂於山水閒戶部侍郎顧珀爲之記泉志鎧爲崇德人吾郡志爲桐鄉人

遂昌雜錄言慧光庵尼無著爲張循王九世女孫以陋故不嫁而挾嫁貲故優裕清源文獻姓氏言尼無著平江府資壽妙聰禪師爲丞相蘇頌女年三十許厭世浮休脫去緣飾咨參諸老余按二說不同因攷蘇

頌爲泉州同安人移徙潤州相哲宗龍圖閣學士紳之子也紳葬丹陽遂居焉丹陽去平江不遠則無著爲頌之女厭世無疑非陋而挾貲者不然王公貴家女苟非有道安肯以陋自退無著嘗有偈云一葉扁舟泛渺茫呈撓舞棹別宮商雲山海月都拋卻贏得莊周蝶夢長履素遺榮清空可誦挾貲者無此言

唐設泉州錄事參軍事一人掌政違失泣符印日功參軍事一人掌租調官廨庖廚倉庫司戶參軍事二人掌戶籍計帳道路過所蠲符雜徭逋負良賤芻藁逆

學海類編 卷之二
遊覽
旅婚姻田訟旌別孝弟司田參軍事一人掌園宅口
分永業及蔭田司兵參軍事一人掌武官選兵甲器
仗門禁管鑰軍防烽堠傳驛田獵司法參軍事二人
掌鞠獄麗法督盜賊知贓賄沒入司士參軍事一人
掌津梁舟車宅舍工藝參軍事四人掌出使導贊宋
設諸曹錄事參軍一員掌州院庶務糾諸曹稽違司
戶參軍一員掌戶籍賦役倉庫納受司法參軍一員
掌議法斷刑司理參軍一員掌獄訟鞠勘之事元則
以推官二員專治刑獄而以諸參軍爲經歷知事照

磨各一員提控案牘一員明因之經歷掌文書出入
知事佐經歷理司事照磨主磨勘照刷設檢校佐照
磨理所事而權日以微提控案牘則又屬之藩司矣
泉志言宋真覺大師名漆志姓陳氏永春人故通直城
伯兄也初住南安雲華巖後遊京師元祐元年奉陳
太后懿旨詔入內祝遂甯王壽勅賜衲袈裟金環條
鈎哲宗御書云遂甯王陳美人願福壽延長施長者
真覺當來同感佛果續賜制劄逐歲度僧天下名山
福地永遠居住初在福禪次住秀州福巖著作佐郎

黃庭堅嘗贈之詩云蒲團不榻付禪翁茶鼎熏鑪與
客同萬戶參差寫明月一家寥落共清風又贊云石
出山而韻自邱壑松不枯而骨立冰霜今得雲門柱
板打破鬼窟靈牀其石也將能萬里出雲雨其松也
故與三界作陰涼此似昔人非昔人山中故友任商
量刑部侍郎陳軒亦嘗贈之詩云車輪馬足走風烟
競看成都萬炬然獨我踏開庭下雪伴師同坐一庵
禪黃庭堅嘗爲作蓮花銘又書草庵歌贈之銘南安
有碑歌刻廬山歸宗寺余按福嚴寺屬吾郡崇德縣

郡志云徽宗在潛邸時陳太后病適真覺在京呪水
治疾有功許其住持名山真覺乞來此賜金環磨衲
袈裟又嘉郡柳志言師有草庵歌黃山谷爲之書俱
與前說異而略故竝書以備互攷

出仁風門半里許爲靈山其上有磐石可坐百餘人中
一圓石下不聯屬勢重萬鈞一夫撼之輒動搖不止
其勢就下若將彈丸走坂然然而百夫撼之雖動不
移也郡守周道光題爲碧玉毬又惠安縣有雲峰上
有大石高廣四丈許又有一石上廣下削高丈餘架

於其上恆有落勢併力推之不動以芥挺之輒動故名曰危石二石之異若一轍焉

南安姜相峰唐相姜公輔謫爲泉州別駕恆居此峰石上刻姜相峰三大字是宋魏公蘇紳書

高士峰在南安是唐校書郎秦系隱處有石刻高士峰三字隸書旁有才翁二字按志謂蘇才翁爲漕使嘗行部至泉題晉江棲真院壁疑此字乃蘇書也

雄山在南安其上有飛瓦巖相傳昔有僧結庵其上因山伐木但患山高運瓦之難積瓦山下誑欲作法飛

瓦砌屋不用工師卜日已定遠近觀者數千人僧僞傭人挑瓦上山觀者欲其速於作法爭爲搬運頃刻都盡僧笑曰吾飛瓦只如是耳或謂之智僧余曰此詭梵然亦可與語權者

金石峰屬南安上有疊石其赤痕類丹書有石刻金石峰三字

泉之山莫多於西南高絕者莫儷於船山羣峰列秀此山獨出於其上勢若一船泉人加以福字故名福船山

韓昌黎言閩人登進士自歐陽詹始故知詹進士第不
但始泉州亦為八閩破天荒也

萬首唐人絕句中於吾郡及泉州有未收者余錄其詩
于左以備補遺

答陸灃

張九齡曲江人

松葉堪為酒春來釀幾多不辭山路遠踏雪也相過

見嘉興府柳志

張建封大夫秦系為校書郎因寄此詩

秦系會稽人隱南安九日山

久是烟霞客潭深釣得魚不知芸閣上遺校幾多書

十三歲戲答清源牧

陳黯南安人

玳瑁應難比斑犀定不加天嫌未端正滿面與裝花

壺公山

井色斜連北蓬闕直倚東秋高巖溜白日上海波紅

以上俱見清源文獻

南安夕陽山真寂寺題詩

宣宗皇帝居邸時遁于此

惟愛禪林秋月空誰能歸去宿龍宮夜深聞法餐甘

露喜在蓮花法界中

見泉州府志

樂津店北陂

歐陽詹 晉江人

嬋娟有麗玉如也美笑當予繫予馬羅幃碧簟豈相容行到山頭憶山下

出蜀門

北客今朝出蜀門
翛然領得入時魂
遊人莫道歸來易
三不曾聞古老言

題第五司戶侍御

曾稱野鶴比羣公
忽作長松向府中
驄馬不騎人不

識冷然三尺別生風

建溪行待陳詡

偕行那得會心期
先者貪前後者遲
空憶麗詞能狀物
每看奇異但相思

以上俱見歐陽文集

戴雲山

智亮 廬于泉州德化縣戴雲山

戴雲山頂白雲齊
登頂方知世界低
異草奇花人不

識一池分作九條溪

見德化縣志

戴雲山吟

人間漫說上天梯
上萬千迴總是迷
曾是老人巖上

坐清風明月與心齊

荅泉州薛播使君重陽日贈酒

秦系 見前

強欲登高無力也
籬邊黃菊為誰開
共知不是潯陽郡
那得王宏送酒來

瀑布泉與唐宣宗皇帝聯句 黃檗禪師

千巖萬壑不辭勞
遠看方知出處高 師
溪澗豈能留

得住終歸大海作波濤 宣宗 以上俱見清源文獻

宗忌之遁跡為僧遊方同安夕陽山黃檗禪師與觀瀑聯句

泉郡志云東出海門舟行二日程曰澎湖嶼在巨浸中

環島三十六如排衙然昔人多僑寓其上苦茅為廬

推年大者為長不蓄妻女耕漁為業牧牛羊散食山

谷閒各斨耳為記訟者取決於晉江縣城外貿易歲

數十艘為泉之外府後屢以倭患墟其地或云抗于

縣官故墟之今鄉落屋址尚存唐施肩吾島夷行云

腥臊海邊多鬼市島夷居處無鄉里黑皮年少學採

珠手把生犀照鹹水即其處也今澎湖已設遊兵汛

守焉

泉州市舶稅課云香之所產以占城賓達儂爲上沈香
在三佛齊名藥沈真臘名香沈實則皆不及占城渤
泥有梅花腦金腳腦又有水札腦登流眉有薔薇水
占城賓達儂三佛齊真臘渤泥登流眉皆諸番名

泉州志天順七年會闈大火焚死千餘人上憐之賜死
者俱進士余意千餘人中亦必有供事人員恐未可
謂俱賜進士因查弇山堂別集科試考是年癸未會
試舉人死于火者九十餘人主試官俱越牆免事聞
贈死者俱進士出身然則舍舉人外其他九百餘人

乃供事員役明矣又按名世類苑是年羅文毅公亦
在闈中賴謝大詔出之公有詩寄大詔云曾同丙子
看鄉榜丙戌春闈又在門南省再逢真父母西湖歸
老任乾坤庚己編則云一峰先生遭回祿垣上一老
人以杖提而出時捐軀者幾二千人而先生獲免出
招老人竟無所得愚謂垣上老人或卽大詔被災人
數亦各舉大槩故不同耳

泉之南三十里曰石龜峻壁上有石二丈許形酷似龜
行旅望之遠近無異吾郡宋太守岳公珂所著程史

學海類編 卷之二
云余外家居泉之石龜卽其處也

有亡賴王三壞柵越渡抱關邱斗五執之法也然斗五乘酒毆王三幾斃三之兄赴府告邱斗仔斗五兄弟共毆屬余拘訊皆白晷讀書子也其兄斗仔毅然自認斗五曰毆三我也何與兄事余壯其義以傷者界曰好護之辜限外可無抵于是斗五家悉力調理乃不死此弟兄重義輕死吾故識之以愧夫因資財而鬪于牆者

泉南雜志卷下

明 樵李陳懋仁無功著

清源山一名泉山漢書朱買臣言東越王居保泉山一人守險千夫不得上今聞東越王更徙處南行去泉山五百里居大澤中今發兵浮海直指泉山陳舟列兵席卷南行乃可破也師古注泉山卽泉州之山保者保守之以自固也泉州府志非其注云自師古時言乃唐貞觀初之泉州今福州也又謂北山之巔乃東甌王避漢兵處然東甌王卽東越王餘善爲漢兵

所攻自所保之泉山南行徙大澤中繇王居股殺以
降漢亦無由至此山也余按買臣聞東越王更徙處
南行去泉山居大澤以爲易擊故請發兵浮海直抵
泉山上拜買臣會稽太守居歲餘與橫海將軍韓說
等始擊破東越是漢兵未攻之歲餘前而餘善已先
去泉山居大澤矣志謂餘善爲漢兵所攻而後去亦
非也又按閩粵王傳故粵衍侯吳陽反攻粵軍於漢
陽及故粵建成侯敖與繇王居股謀俱殺餘善以其
眾降橫海軍所謂漢陽則又非泉山矣余登泉山及

巔五里梯磴頗夷不爲峻峭卽有險可守然皆側徑
細路不能儲餉四面平疇困可立敵若陵谷已變遷
則已如未變遷吾意餘善欲保守自固必不居此絕
地是知非買臣所指之山明甚志雖表其非是然略
而未備且有先攻後徙之舛余故申其說以俟考焉
宋顯謨閣學士泉人傅伯成狀前嘉興守程公行實其
略云公諱卓字從元徽休甯人開禧二年除司農寺
丞十二月以親老抗疏請外補差知嘉興府丁母新
安郡夫人艱嘉定三年八月服闋以嘉興治最授朝

奉郎歷官正議大夫同知樞密院事致仕新安郡開
國侯贈特進資政殿大學士又云樵李輔郡公以推
擇出守剖決如流莫不切中其情然終歸平恕或僞
宋爲倖廳印紙與奸民爲市以充契券之用流布既廣
吏因事覺視爲奇貨謂無真僞當歷加追驗則所得
可裨郡計不少公曰此不過僞造者罪耳若一一驗
之編民竝擾吾以安民爲先利非所急也乃喻民有
誤買者許自陳立與換印陳者畢至一郡晏然尋以
內艱解郡按此則知公之澤被吾嘉甚厚乃吾郡志

自元郡幕單慶學博徐碩及明太守柳公遺公之名
與事之實後遂泯泯余讀清源文獻漫爲錄出以備

補遺

泉自五代之際腴田多屬寺觀民間其下者耳厥後漸
爲勢佃轉相沈匿寺觀反累虛糧至今數百年來尙
有清查寺田找價爲充餉之用者余嘗奉差稽覈溷
不可了朱紫陽簿同安日有詩云輸盡王租生理微
老僧行乞暮還歸空山日落無鐘鼓惟有虛堂蝙蝠
飛是知僧寺糧累而貧宋時已然矣

唐盛均泉人也嘗病白孔六帖疏略廣爲盛氏十二帖
宋鍾璇亦作續白孔帖

泊宅編載泉州萬安渡水闊五里蔡襄造石橋兩岸依山非也余嘗往來此橋及按端明自爲記長三百六十尺非五里岸左而山非依山岸右則去山尚遠也
宋德祐二年十二月蒲壽庚反知泉州田真子以城降子元考泉州府志田真子晉江人文文山同榜進士爲州司馬蒲壽庚其先西域人與兄壽宥總諸番互市因徙于泉以平海寇得官壽庚頑暴寡謀壽宥爲

之畫策密畀壽庚以蠟丸裹表潛出降元今但知壽庚之叛宋而不知壽宥之主謀也其子師文尤暴悍嗜殺孫勝夫其黨也余按宋元通鑑云我太祖皇帝禁泉人蒲壽庚孫勝夫之子不得齒於士蓋治其先世導元傾宋之罪故終夷之也又資治通鑑府志俱曰田真子而薛方山宋元通鑑則曰田子真兩通鑑俱稱田知泉州而府志則稱田爲州司馬名與官皆屬互異故并識之不致賊臣溷逃斧鉞也
衛民祠爲前守熊公設也公諱尙初江西南昌人由吏

員正統末知泉州剛梗廉勤有善政時鄧茂七反據汀延遣劇寇侵掠泉界民甚危之郡將王指揮觀望不武公曰吾當躬禦不可延寇殲吾城請師未下乃提民兵與晉江簿史孟常陰陽正術楊仕洪拒戰于古陵坡皆爲賊所執欲屈之公執不可迫取贖又不可公氣愈厲罵愈甚遂皆死之繼而重兵至賊走後錄其死事祠以祀之以楊史配萬歷己巳太守東山張公見其祠傾圮立欲新之命余董厥事甫庀材鳩工有庠生某以其父有近時說賊功欲塑像史楊之

次余曰有勞桑梓與死事竝祀固與禮合但須論定當事議許而後可會公解組去後無任事者祠尙頽然蓋熊公以吏起至二千石爲民死賊城得保全血食千秋神爽赫弈誰謂掾吏無人哉公之外又有羅明以劍州判罵賊死曾璉以連州判禦賊死鄧俊以榮山尉禦賊死陳一道以蕪湖丞禦倭死俱蒙恩蔭且立祠焉嗟嗟此數君者甘殺身以成仁不求生以害義故能心堅鐵石操厲松竹履危亡而不顧飲刀斧其如飴是知蹈節捐軀不限人地彼紆朱鳴玉者

視死在前而欲成此徽烈幾何人哉

國朝掾吏不但熊况兩公官太守俱稱名臣其尙書侍

郎卿寺銓司台省藩臬二千石府佐縣令不下數十

百人無論各省多有卽以泉與吾郡可指而數者泉

州有張苗南通政使張暉光祿少卿劉仲修工部主事黃均知縣趙應

實知縣加六品黃永甯波湖州廣信三府知府嘉興有殷昶監察御史陳宣

河東運使張翊大理評事顧琛吏部郎中葉春刑部右侍郎張振重慶知府金

宗禮部郎中以上俱互見弇州別集泉嘉兩郡志雖進取

或有超資要亦有可用者在故知國家未嘗不用異

特患頽靡不肯自立苟有自立者出而不爲羣如所
射者少矣且當事者不但不爲振拔反疑而伺察之
使舍沙得行蘭藉共刈是非所以激有志以勸後來
也

東嶽行宮坊扁曰萬山第一是米元章書第一山刻妙
覺巖下者相傳一羽士臨出自書萬字足之

余有米南宮寶藏二字刻于無爲州者徑二尺許大有
神勢欲摹刻清源山中客有謂余曰院司且經遊公
位下未宜勒石余乃笑而止

庫貯敗鐵甚夥皆先後所收不堪軍器也余嘗監收目擊可用乃兵子飾虛利在培餉不論堪否故毀解還余議堪者官給工料分發各營修理兼用不堪者作鐵與之於軍器銀內銀七器三照額搭給解驗查盤一如新造之法併散雨溼火藥而加礮提之計省二千餘金卽於餉銀內扣庫以抵下年額征節軍費以紓民力計無使此沈都關士宏力贊如余言郡司馬楊公司理李公欣然覆議各以陞任丁艱行視篆汪公因議具申乃當事者泛視不行終作朽物惜哉

興化有海洋劇寇數輩俱寘典常惟賊首杜某尙在逋逃乃興化海防同郡夏靖原公所部事也中丞御史臺嚴限不獲一日公密札示余曰此巨寇也幸加意緝之余始物色其人饒於資善航海又多黨與非計得不可乃屬意謀者曰幕君與夏多桑梓情能爲爾地來吾爲若屬幕君圖之否則終爲他擒無脫理爾卽走海如妻子家產何杜然其言果至余乃縛送科結初公之緝此賊久屬余最後偶然耳不虞余得之如吹塵也乃知作惡者終不能逃法網耳

余司干擲一青衿失盜稱明火強盜劫錢物數百金在
事賊曰城中盜至此極乎切責余往勘盜蹤至則見
一閒矮屋門有火炙一孔若將伸指探屢屢者余不
問所失第檢所存有竹竈一竈傍匡牀一綻布被一
舊履一量盃筋數器依牀一桌而已余卽以開覆在
事吒而遣之余問青衿曰公此舉何居青衿答曰賊
雖無所得然生既貧反得所司例守暴客故作此鬧
事聊欲給其比追耳

城中一夕被盜捕兵實爲之招直巡兩兵一以左腕一
以胸次俱帶黑傷而不腫裂謂賊棍毆意在抵飾當
事辭責司捕之弛於干擲也甚厲余意棍毆處未有
不致命且折亦未有不腫且裂者無之是必贗作問
諸左右曰吾鄉有草可作傷色者爾泉地云何答曰
宋此名千里急余令取搗碎以二人塗如其處少焉成
黑以示兩兵兩兵愕然遂得好狀自是嚮道絕而外
客無所容矣按本草千里急一名千里及藤生道傍
籬落閒葉細而厚味苦平小有毒治疫氣結黃痛蟲
毒煮汁服取吐下亦搗爛敷蛇犬咬不入眾藥第不

學海類編 卷之八 遊覽
載此草可染膚黑如鳳仙花可染指紅也

葉湜爲泉州惠安丞真文忠公守泉時引以自助有擒賊功甚著公爲作墓誌郡志失其名何也蓋未見西

山文集耳

宋進士呂造詩云閩海雲霞遶刺桐往年城郭爲誰封鷓鴣啼困悲前事豆蔻香銷滅舊容刺桐城今泉州築城時環城皆植刺桐故號桐城

宋王勺泊宅編云七閩地狹瘠而水源淺遠墾山壟爲田層起如階級然每引谿谷水灌溉中塗必爲之磴

下爲磴米亦能播精朱行中知泉州有水無一滴不

泉爲用山到崔嵬盡力耕之詩蓋紀實也余曰否蓋余

於泉嘗履畝焉聽斷中多有爭水者其田謂之糞水

田以水源遠近爲價之高下如吳中上鄉下鄉然港

宋脈鮮少源流僅是一溝或積一潭各從其派非共由

者不得盜決支流田傍各濬土坑蓄水遇旱置桔槔

引灌夜則守之以防盜汲朱行中所云水無一滴不

爲用蓋在此不在磴春也余所經浙之金衢達建安

始有水磴田開山壟閩實爲多故余詩有湍中纍石

開泉磴天半鋤雲種水田之句又泉志郡守無朱行
中元祐閒有朱服改知婺州婺州卽三國時東陽也
泊宅編謂朱行中嘗守東陽故知行中或卽朱服字
也不肖益夫支派田劉谷密士武請本數早遺詩林
宋陳復齋必知泉屬安溪時各色錢不係上供例歸縣
官吏以例進公曰入縣卽爲官錢私有之則賊也良
久曰此一例字壞了許多賢士大夫
泉南號文章之藪而載籍甚少何也所見者惟歐陽行
周文集真西山忠經清源文獻泉郡志敬由編王梅

溪真西山公溫陵畱墨蔡文莊公集王遵巖先生集
此外無聞焉或曰藏書家祕而不行耳何忤菴先生
曰蒲氏之變泉郡槩遭兵火無復遺者又僻在一隅
傳播不廣習尙織嗇梓刻不多地氣卑溼蠹魚爲虐
慨前人之苦心悲後世之漸滅故公集清源文獻以
表前人而引用諸書皆出家藏也
有一婦因夫出賈便告離夫屬余鞠之余意買臣婦離
夫謂其終餓死溝中故也經商非貧離之必有姦事
陰遣人門外覘之果得姦夫論詞科斷

余慕佐王君者以細故瞋相余以釋提婆那與佛問答
二偈解之其問偈云何物殺安樂何物殺無憂何物
毒之根吞滅一切善佛答偈云殺瞋則安樂殺瞋則
無憂瞋爲毒之根瞋滅一切善王君爲之改容雖然
悔失攻中而怒不可拔矣

泉濱海颶風時作客因曰此非雄風乎然不聞有謂雌
風者余同僚山陰俞君善謔曰今內孺威作非雌風
乎余笑曰雖然風亦有相偶者宋玉賦有大王風劉
孝威詩有少女風風俗通有君子風北史有小人風

優童媚趣者不吝高價豪奢家攘而有之蟬鬢傅粉日
以爲常然皆土腔不曉所謂余常戲譯之而不存也
先是一彪黨舉此以爲傷敗風俗建白當事據行之
然而此種蓄於有力家雖禁弗戢第長彪黨之風則
曰吾言足以取信當事從而伺察人過動欲檢舉設
機嚇詐卑官黔細爲之不安余雖白府竟不我信已
而果驗余言故凡建白頭出更老要亦事可施行假
公濟私所當深察也

迎神賽會莫盛於泉游閒子弟每遇神聖誕期以方丈

木板搭成擡案索綯綺繪周翼扶攔置几於中加幔於上而以姣童妝扮故事衣以飛綃設以古玩如大士手提篋筥之屬悉以金珠爲之旗鼓雜沓貴賤混并不但靡費錢物恆有鬪奇角勝之禍至於宵分鼓死寂然無聲便是人消物化境界富貴下場榜樣矣雲閒徐子丞贊晉江嘗問余曰律例果皆鄼侯作耶余曰漢高祖法三章蕭何增爲九章叔孫通又增爲十八篇文帝除肉刑景帝減笞數武帝律令凡三百五十九章大辟四百九條千八百八十二事後世增刪

不一我明附例居多凡遣戍則引例非律也漢景帝時笞者箠長五尺其本大一寸其竹也末薄半寸皆平其節當笞者笞臀毋得更人畢一罪乃更人然此代斬趾代截鼻非施之罪外者也後世用竹爲刑具始于此不但施之罪外甚則五下一更人笞臀去遠至於胯不曰笞而曰打矣古之五刑一曰墨鑿其面以墨涅之二曰劓截鼻也三曰宮淫刑也男子割勢婦人幽閉四曰剕斷足也五曰殺死刑也今之五刑一曰笞用小荆杖決打一十至五十每一十爲加減

一等二曰杖用大荆杖決打六十至一百加減等如上三曰徒拘收在官以應用力辛苦之事一年至三年爲五等半年爲一等酌罪輕重而加減之四曰流既流去遠方終身不得還鄉二千里至三千里爲三等五百里爲一等酌罪輕重而加減之五曰死絞斬也絞全其肢體斬首身異處凌遲極刑也

丙午旱魃爲虐米價騰貴兼一時私錢盛行卽官錢驟亦不用議者欲減價平糴併禁私錢百姓嗷嗷至于罷市余白府曰泉地米少不比米多處可以定價今

所籍以裕地方者全在海商若一減價商必走他趣厚利泉雖多財如米之不至何故宜一聽市值俾海商聞之俱來米既集而價未有不平者若私錢新鑄也火色未純與官錢異第緝治以私鑄之舉則官錢自復府然余言不浹旬而海米來集其價遂平錢亦復故

丙午夏旱署府別駕舉繁露之儀禱而月而土益焦說者謂南門宜禁不爲通者浹旬百姓皇皇絕於水火余曰南門閉則宜雨閉久不雨則非南門之故何徒

苦百姓爲當事始啓門數日雨

余方輯雨異一書閱泉志至正十三年七月雨白絲書
投籠中如得至寶

宋曾公亮晉江人少客京邸有鄰生泣悲甚問故生歛
歛久之乃曰僕因事負官錢貧無以償僅一女鬻商
人四十萬貸官行有日故泣耳公曰商人轉徙不常
孰若售之我平生喜卽如數與錢約後三日以其女
來吾且登舟以俟生如期往公解維已三日矣公歷
官顯要以太保致仕卒年八十贈太師中書令諡宣

靖配享英宗廟庭及葬御篆其碑首曰兩朝顧命定
策亞勲之碑

薛天華字君確晉江人其居鄉左戒云母通要路書以
務養節則俯仰不瀆母豫塵紛事以務養寂則內外
不擾母殉末俗態以務養高則志行不羞母受非禮
餽以務養廉則彼己不失母妄結賓從以務養交則
戚黨不棄而善彙集母苟出言語以務養德則靜噪
不爽而口過息母逐戀嗜好以務養神則天倪不伐
而和氣全母厭薄遲鈍以務養量則機心不熾而真

性得毋譏訕世短以務養福則不伎人以見直而鬼
責消毋虛邀時譽以務養誠則不恕己以見賢而潛
德進毋妒疾雋能以務養才則不設阱以誣善而有
獎藉之功毋歆羨汰靡以務養嗇則不競侈以蠹俗
而有由禮之漸公 世廟時官方伯講學勵行以清
白稱

蘇隨晉江人嘉祐二年進士令博羅棄官歸號紫雲先
生葆神鍊氣不與俗接一夕夢遊異境覺而賦詩曰
夢乘鸞鶴到仙家侍女風流魏月華琥珀盞斟千歲

酒琉璃瓶種四時花金函藏籙文刊玉石壁題名篆
點砂一枕北窗初睡覺日移門外柳陰斜後數年端
坐而逝

唐僧無等會稽人居南安延福寺盧刺史三請不至遣
使仗劍云不下山取頭來無等曰身非我有况頭邪
禪寂自若盧嘆曰空生之道一至是乎

宋魏國夫人陳氏晉江人龍圖從易之女內翰蘇紳之
妻丞相頌之母三公皆嘗爲杭守陳題杭郡舍柱云
吾少從吾父至此邦中與吾夫偕來今同吾兒凡三

到盡閱江山之勝

歐陽公詹初發太原途中寄所思詩有云高城不可見
况復城中人以此得函髻之誘何怍菴先生曰此樂
府體黃璞乃謂公悅太原一妓卒以殞身好事傳之
不信韓退之李習之李貽孫信璞何哉余按公詩有
太原呈薛侍御齊奉禮和嚴長官登太原龍興閣陪
太原鄭中丞登汾上閣上太原李尚書是皆所謂城
中人也故結句云流萍與繫匏早晚期相親流萍喻
聚散繫匏公自喻若思妓則安用繫匏且太原妓函

髻詩起云自從別後減容光此乃鶯鶯句剽竊傅會
其誣益見矣

張襄惠公巡撫江西時奉詔建嚴內閣迎恩樓有司重
復以請公曰供費如式寔奉明旨批卻之又夏內閣
築生墳使司議廣信七縣每縣措夫價一千金公曰
範金爲槨乎每縣百金足矣夏謝曰愛人以德者固
當如此

宋鄭俠福清人官司法參軍會大旱民流繪圖上神宗
致迂羣奸徙英州元祐初東坡孫覺薦起爲泉州教

授

韓國華守泉州祥符元年戊申七月二日生魏公於泉州州宅世言魏公居河朔故其狀貌奇偉而有厚重之德見嬾真子

王文正公會本泉州人八歲徙青州益都本朝邱文莊公其祖亦晉江人爲小官於瓊州因家焉

吳中人物志云元陳寶生母莊氏海鹽人其父韓思恭泉州大商贅于莊一年生寶生甫四月恭去商海上久以爲死莊誓不嫁後恭還及五年又浮海去遽溺

死莊益守志恭有前娶生子曰寶一在外家莊曰彼所生與吾所乳均出吾子乃質田與之養恭又嘗假貸友人五十緡友人至是負官錢繫獄莊曰不可死有所負也傾橐償之寶生與寶一爲兄弟如同胞寶一死寶生爲育其孤女是知莊善教之有素也寶生長好文與縉紳大夫游乞言表揚母節嘗築春草堂奉母于太倉里第余按嘉興府志海鹽縣舊志徐一夔贊序樂郊私語俱以莊爲泉人陳爲鹽人以商至泉贅焉府志又言莊攜其孤歸海鹽莊以壽終高季

迪作詩美之則恭爲泉人似無疑然三書俱不載莊
之償貸及質田養前妻子與寶生育孤三事樂郊私
語又言黃公望子久拉彥廉寶生字觀濤陳泣曰陽侯
父仇也何忍以怒眼相見子久爲之動容不看而返
因作仇海賦以記其事其觀濤事人物志亦不載故
竝錄出

科第之盛莫盛於泉如嘉靖戊午鄉舉中三十五人辛
酉甲子各三十四人近科有及五十人者若嘉靖甲
辰科入試舉人八十餘人俱下第此又一時盛衰之

異也

真文忠公於嘉定紹定間兩知泉州余讀公集有登金
山詩云江來朱方注之東海潮怒飛日夕相撞春天
將古來義士骨化作狂瀾中央屹立之青峰孤根直
下二千尺動影裊宛冲融中黃金側布蘭若地鑿翠
面面開窗櫳雙橈伊軋破浪屋恍忽置我高巖從是
時千山雪新霽水面月出天清空濤聲四起人籟寂
毛髮蕭爽琉璃宮披衣明發躡煙靄決背俯入歸飛
鴻襟前渤澥斂暝色袖裏岷峨吹曉風越南燕北但

一氣塵埃野馬何時窮蒼梧虞舜不可叫王事更恨
歸怱怱正德閒鎮江推官史魯修京口三山志不載
此詩公之詩至於遺漏可知矣

歐陽公曰晚唐詩人無復李杜豪放之格然亦務以精
意相高如周朴作詩構思尤艱極其彫琢故時人稱
朴詩月鍛季鍊未及成篇已播人口余攷朴吳人隱
泉州安溪余有事過縣經永安里周塘卽其隱處後
徙福州黃巢攻城得朴曰能從我乎對曰我尙不仕
天子安能從賊巢怒殺之湧白膏起數尺

布衣黃孔昭泉州惠安人何忤菴先生曰孔昭詩如入
幽林長薄其樹木皆世所有而鬱然蒼翳遂覺老蒼
歷下琅琊所稱盧謝未之或先

何茂先晉江布衣也陳爾身曰予讀人之文多矣至觀
茂先之作多撫几流涕蓋其孝弟之言動人殊深
泉人蔡元偉云孤舟孤燈聖賢爲侶真有一日似兩日
氣象

泉南布衣陳建勳年在耆老性好吟咏執操貞厲居貧
若康嘗從何儀部研精墳典於歐陽行周讀書處超

然絕迹可謂挺孤節於靡枝激清風於頽俗者矣
 宋司農卿湖廣總領詹體仁淳熙閒嘗為泉州晉江丞
 程尚書大昌司馬侍郎及相繼為守尤加賞異待以
 賓禮郡有疑獄必諮焉嘗提舉浙西常年謂浙右之
 有漕渠非止通餽運資國信往來而已蘇秀常潤田
 之高仰者實賴之於是開漕渠濬練湖置斗門為旱
 澇備真西山為公作行狀公於泉郡有善政於吾郡
 有開渠功泉志失之余為錄出
 守令庶屬雖有崇卑而官制悉志之者昭臣服徵淑惹

也閒有遺落或承前闕爰採泉與吾嘉兩郡人官是
 邦者錄于左方以補未備其已志而并錄之者便類
 考也

泉郡人官吾嘉者自藩臬外有

林瞳 晉江人正統十年任桐鄉令見嘉志

林旺 安溪人歲貢正統閒任秀水丞見泉志

林敏 惠安人歲貢景泰閒任嘉興丞見泉志

蘇疇 安溪人歲貢天順閒任海鹽訓見泉志

盧昭 惠安人歲貢天順閒任嘉興稅課大使見泉志

饒恕 晉江人監生成化十二年任桐鄉訓見嘉柳志

汪順 同安人吏員成化間任崇德丞互見兩郡志

蕭韶 宏治癸丑任海鹽諭見嘉志 泉志作博羅訓

林秀 晉江人歲貢正德間任桐鄉訓見泉志

連桂 惠安人歲貢正德間任海鹽諭見泉志

洪熊 南安人舉人正德八年任平湖訓互見兩郡志

曾仲魁 晉江人嘉靖二年進士給事中陞嘉興池州知府見泉志嘉志關或未任

徐榮 晉江人進士嘉靖癸巳任嘉善知縣互見兩郡志

溫學舜 晉江人進士靖乙未任桐鄉令

李漢 安溪人歲貢嘉靖間任桐鄉訓見泉志

陳道基 同安人進士嘉靖庚戌任嘉善令互見兩郡志

田相 泉人秀水典史

王用中 泉人秀水簿

鍾信 泉人王江涇巡檢以上俱嘉靖間任見海鹽舊志

蔡民望 晉江人舉人隆慶庚午任嘉興同知見嘉志

史朝鉉 晉江人進士隆慶己巳任嘉善令互見兩郡志

蔡貴易 同安人進士隆慶壬申任崇德令互見兩郡志

胡世華 晉人杉青閘巡檢

駱世元 晉江人 杉青關巡檢

王三陽 晉江人 進士萬歷辛巳任嘉善令互見嘉志履歷

蔡彭 晉江人 進士萬歷甲申任嘉善令互見嘉志履歷

薛喬登 晉江人 萬歷丙戌任桐鄉令見嘉志

謝吉卿 晉江人 進士萬歷己丑任海鹽令見嘉志履歷

林夢琦 晉江人 進士萬歷己亥任平湖令互見嘉志履歷

郭日彊 晉江人 萬歷甲午任嘉興簿

余嘉郡人官泉者自藩臬外有

劉昌 海鹽人 選貢洪武間任泉州訓見嘉志泉志闕

許珣 海鹽人 舉人正統間任安溪令見海鹽舊志嘉志作訓導泉志闕

徐忠 海鹽人 歲貢景泰間任泉州經歷見嘉志海鹽舊志泉志闕

王輔 崇德人 歲貢天順七年任泉州訓互見兩郡志

周密 海鹽人 吏員天順間任安溪典史互見兩郡志

鄭恂 海鹽人 吏員天順間任晉江巡檢見海鹽舊志

汪順 嘉興人 選貢成化間任泉州訓見泉志嘉志作汪頤

王浩 平湖人 歲貢成化五年任南安簿見嘉志泉志作湖州人

顧旭 嘉善人 成化二十一年任永春典史見泉志

周家顯 海鹽人 吏員成化間任泉州巡檢見海鹽舊志

沈慶 嘉興人監生宏治九年任惠安簿見泉志

夏雄 歲貢任晉江訓導見嘉郡柳志

王箴 嘉興人正德九年任泉志作泉州訓 嘉志作教諭

沈鏞 平湖人嘉靖五年任惠安訓見泉志

譚鎧 崇德人舉人嘉靖九年任泉州推官見泉志 嘉志作桐鄉人

吳元 海鹽人監生嘉靖十年任南安簿見泉志

孟鍾 嘉興人吏員嘉靖十三年任惠安簿見泉志

俞咨伯 平湖人進士嘉靖十九年任泉州知府見泉志 嘉志官提學副使

仇俊卿 海鹽人舉人嘉靖二十九年任惠安令見泉志 嘉志作博士

支大綸 嘉善人進士萬歷閒任泉州推官 以下俱泉修志後任

金枝 崇德人進士萬歷閒任同安令

李在公 嘉興人進士萬歷閒任同安令

夏建寅 秀水人舉人萬歷閒任惠安令

陸鼇來 海鹽人舉人萬歷三十年任泉州通判以上互見嘉興志歷科履歷

與余一時共事者有費和 海鹽人吏員萬歷三十一年任南安典史

姚宗垚 秀水人吏員萬歷三十一年任南安典史 張化龍 嘉興人吏員萬歷三十一年任晉江縣福全倉副史

朱垚 嘉興人吏員萬歷三十一年任康店驛丞 不佞懋仁 縣全門倉副使

則泉州經歷也

泉州朝天樓考志自唐貞元九年郡牧席相修後無有繼者四門博士歐陽詹序云倚層霄於軒檻納千里乎窗牖此郡北牖之立候樓也萬歷乙巳冬余董城工見其歲久傾仄居人兢兢焉虞有拉攏之患余亦念圯而後新則爲費鉅故欲易五六朽柱而正之不費官帑不煩民力止取於余所董城工之羨緡中經月可竣議白道府屬余經紀其事甫庀材而異議鼎沸有謂關於文風者有謂關於火災者又謂非千金非經歲不訖工者甚而曰有巨室重堪輿言賄匠易

制者余曰樓有二十四柱僅換六柱而舊制移如眾柱何監司句餘陳公司李故鄣李公拂羣議是余言咸出薪俸助工於是議者不能難是歲十一月二十六日興工十二月二十五日安獸所費才一百有四兩訖工僅三十一日耳因請句餘公扁其樓曰三台拱秀云丙午八月三日海嘯颶作郡中石坊公署多所傾圮惟茲樓巋然獨存慰余始志是歲鄉舉三十人明年成進士十二人魁二人及第一人館選二人修城銀四百八十兩內節羨七十在庫余雖罷歸當事自能找發必不累趨事民也

清源文獻曰朱鑑字用明晉江人永樂十二年舉人官至都御史正統己巳之變公涕泣憤恨於君父之仇疏十餘上皆防邊大計其保障雁門方略至今賴之黃河清曰詳公之世有足陰維社稷動天地而感鬼神者惜彭惠安錄本朝名臣於公偶遺也余考吾學編名臣記弇山堂別集都御史表亦俱未錄余故備書以俟補錄者按公初授蒲圻教諭以學行擢監察御史按湖廣廣東俱有諭賊緝奸大績權璫士振挾駕出師公時陞山西左參政上疏懇留極言虜勢太

皇太后讀其疏泣下土木之變公勒兵勤王以遏南侵令諭陞右副都御史巡撫山西保障雁門要害公涕泣憤恨以君父之讎不共戴天上疏言天位不可以無主神器不可以久虛宜急立儲君選智勇之將托忠義之臣開直諫之路杜權倖之門早革內侍之政再造中興之業雪前恥以圖後功公在山西十餘年前後奏疏皆防邊大計疏多不錄所賜璽書至五十餘道石亨曾以失機爲公所刻憾公公遂懇致仕家居二十餘年壽八十八無疾坐逝訃聞諭葬宏治

閒公鄉人王宣從祀鄉賢議云公之爲人雖所行未能盡合聖軌上比孔庭然其精忠峻節餘韻流風自足以風勵人臣楷範後學於是公遂列於俎豆矣王宣者以鄉舉受業蔡文莊公之門養親不仕次崖林氏曰先生俯視一世仰觀千古使竟其所至必有發前聖所未發者後亦從祀因併著焉

臺灣隨筆

清 雲閒徐懷祖燕公著

乙亥之春余再至閩漳竊思廿載萍蹤若燕齊秦晉魏趙吳越楚粵滇黔之間所遊歷者多矣詎意復有臺灣之行然觀海亦吾素志慨然往焉凡自漳入海者皆于石碼登舟由海澄以達廈門金門而後出大海廈門距海澄三十餘里迤南則爲金門皆海之歧流所經閩南藩維之最衝者也禹貢所載自衡岳以南疏淪無聞蓋以滇蜀之界如黑

水南流滄水西流皆非中原海道閩越之間率多負山面海其水自能歸墟也

凡郡邑之濱海者皆裨海也各有重山疊嶂衛其外卽瓊崖崇明定海之地亦尙在裨海中若安南則陸路可達惟臺灣一郡孤峙大海

臺灣于古無考惟明季莆田周嬰著遠遊編載東番記一篇稱臺灣爲臺員蓋閩音也然以爲古探國疑非是

臺灣山甚高亦多平原可耕藝周圍五十里自有土番

居之多巢棲而不火食者無所求于中國明天啓時漢人顏思齊誘日本國人屯其地鄭芝龍附之未幾荷蘭人由洋中來假地日本久而不歸遂築城而有之 本朝順治十八年鄭芝龍之子成功京口敗歸廈門欲取臺灣東鹿耳門水漲遂艤舟以臺荷蘭戰不勝拒守久之乃棄城去成功始以夜郎自待矣傳其子經孫克塽外通諸番內擾濱海今

上康熙十八年始命將征之一戰而克澎湖師臺灣而克塽降兵不血刃遂定其地東西五十里南北三千

里置郡一縣三郡治之外則番人居之仍其舊俗
海濱弛禁以後人置漁舟家有商舶惟商舶可以航海
凡使節往來咸藉之
海艘上平而下銳期于足禦風濤凡百工械具以及日
用糗糒靡不畢備而尤急于儲水偶有被風沙嶼之
上者或至不能粒食而蚶蛤羸蚌猶堪鼓腹惟水則
必不可得也

自海澄登舟遂行至廈門尙在支流中然已震蕩不甯
矣遙望遠嶼白浪出其上又見他舟似鳧鷖入水復

出腸胃之閒爲之溢湧海中率多磧沙舟不可近時
以長竿測之而後行其緣檣者覘雲氣望遠近也緣
帆而上捷于猿猱亦或兩人偕登至于檣末竝坐談
笑自若卽在大海中亦然

廈門築城于山巖兵戍之其地連縣數百里然皆山嶂
也海外迤東屬國皆貿易于此偶見有紅毛番船至
其廣大倍于閩舟而製造精巧尤不能及聞彼一舟
之費以鉅萬計其人能入水而行

舟艤廈門適遇石尤遲回十許日始得西北風而行第

學海類編 三 遊覽
觀其發矻掛帆亦艱辛之甚矻以木爲之長丈餘末
有兩齒如鹿角繫以長絙而遠布之泥淖中船卽止
廈門稍南有團山在中流逾此卽大洋故舟人呼爲
海門云

大海之中波濤洶湧之狀筆不能盡惟是四顧無山水
與天際仰觀重霄飛翔絕影蓋鳥亦不能渡海也以
此知爰居海鳥故非常見若帆檣之側禽鳥翔鳴則
必有島嶼在望矣舟在大洋中風利卽長往風不利
亦可復還所泊處或風勢甚惡舟不得迴則惟有東

西南北任其所之耳

海上風信甚者曰颶尤甚者曰颶可以計日候之或前
或後大約不爽若天邊雲氣如破帆卽颶颶將至斷
霓者斷虹也亦風至之徵蘇軾颶風賦所謂斷霓飲
海者指此

海中風利舟行迅決若風恬浪靜則靡靡中流所謂海
船無風不能動者如是日星河漢俯仰爛然風景殊
不惡但苦無繫舟地耳

茫茫海道舟人固不識也惟東西南北則以羅經視之

其所往之地非山不可辨若宵晝行而不見山亦莫測其遠近故有瞻星察氣緣橦遠望辨水之色及視泥沙之臭味者一遇島嶼可以泊舟則尤兢兢焉蓋海嶼雖卑而水中尙多巖巒又有積沙如隄阜皆能敗舟且山上迴颿亦能噓噙其舟而膠之及已泊之後猶恐潮汐往來及戕風猝至故澳中有必不可藏舟之處

島嶼在澎湖甘吉洋在澎湖之東雞籠山在臺灣北鹿耳門在臺灣西皆險要也

臺郡番民種類甚繁莫詳所自或云秦始皇時方士將童男女五百人入海蓋出于茲山而育種至今

臺地物產無異中原略載其異者波羅蜜自荷蘭移種大如斗甘如蜜香樣大如雞子味甘色黃其根在核然不能如荔走長安也照殿紅樹甚高花如巨觥色紅無二樹蘭如珠蘭然亦喬柯修幹竹多叢生節疏葉長至冬則其葉盡落及春復生頗似江柳象齒有實可食林茶亦內地所無惟鱗介之族其形殊異者不可殫述

學海類編 卷之五 遊覽
余之初至廈門也舟人以為有風候遂登陸假寓已而大風雨者三日夜舟藏曲島幸而得免然聞臺灣之間頗有漂溺矣迨風霽夜發甫出海門行及三鼓風稍厲或有懼色遽命回舟昏黑中捩舵而西幾至不測既明始達于金明之山後荒嶼無居人僅可避風耳舟泊中流不得登岸抱膝而坐者累日及晴霽無風乃復掛帆則汎汎悠悠舟亦不動反不如平江中可以搖櫓為力也越三日而至澎湖其嶼甚卑方數十里室廬亦少置軍守之自廈門至此始可泊因

幸其無風遂不繫舟而行又越二日而至臺灣臺灣距廈門不知若干里而舟人稱海程則以更為計云自廈至臺為十一更自臺至松江之上洋為五十六更然問其所謂更者莫解其義也余在臺灣一載乃復從海道歸既登舟止于鹿耳門十日鹿耳門為臺灣門戶其水中沙石纍纍環滌出入危險舟行畏之既而啓行南風甚勁海師以指南針指子癸之次凡三日三夜乃日觀風濤之壯然已逾金廈漳泉而徑達于興化之港矣自閩之興化歷福州福甯入浙之

溫台甯三郡以達于崇明上海凡五日五夜而至皆
行于海濱之歧流中雖有最深廣處而非大洋也

廣州遊覽小志

光孝寺

清 濟南王士正貽上著

光孝寺又名法性寺在粵城西北越王建德故宅也孫

吳虞翻居此手植訶子因名虞苑

又名訶林

東晉隆安五年

罽賓國曇摩耶舍尊者駐錫曰王園寺劉宋永初中求

那羅跋陀三藏始創戒壇梁天監元年智藥三藏自西

竺來植菩提樹壇前預識曰後一百七十年有肉身菩

薩于此樹下開演上乘達磨初入國中亦止此寺其後

五傳至惠能遂開東山法門于此今祝聖殿曇摩遺跡
也有米元章書三世佛名稍北爲六祖殿前爲菩提壇
壇側爲髮塔其東南爲達磨井西爲五祖殿循廊而東
爲風旛堂堂前有池泓然又東有偽漢鐵塔上有題記
稱大漢皇帝大寶十年四角有沙門某某題名繫銜皆
金紫大夫檢校工部尙書又東爲譯經臺洗硯池房融
筆授首楞嚴處西廊復有一塔規製差小題玉清宮使
德陵使龍德宮使開府儀同三司內侍監上柱國龔澄
樞同女弟子鄧氏三十二娘及大寶六年歲次癸亥字

粵城內外古道場以光孝爲第一氣象古朴殊乎他刹

六朝已還名僧居此者曇摩耶舍求那羅跋陀智藥三

藏初祖六祖印宗法師波羅末陀

陳刺史歐陽頎請譯佛阿毗曇經金剛般若

性論共四十部 般刺密諦 譯楞嚴者 仰山通智禪師憨山

德清法師天然函罡禪師同遊黃太史忍菴高廷評叟

園屈翁山陳元孝張超然三處士程燕思秀才人賦五
言詩

六榕寺

淨慧寺舊名寶莊嚴寺蘇長公南遷過此書六榕二大

字因名六榕寺今寺額卽蘇書也寺有舍利塔梁大同中沙門曇裕建舊有唐王勃碑宋紹聖閒寶雞主簿林修重建宗室康州刺史叔益撰文塔九層高二十丈廣六丈有奇中藏佛牙舍利當修重建時掘得巨鼎藏劍三鏡一同舍利瘞之元至正閒又增寶珠銅柱之屬憑高眺遠則白雲粵秀諸峰皆在襟帶也寺有永嘉禪師證道歌石刻禪師謁六祖祖歎曰善哉少畱一宿宗門謂一宿覺

五羊觀

五羊觀在城中西南坡山上有穗石洞五仙祠吳立夫南海古蹟記云楚高固時有五仙人人持穀穗一莖六出乘羊衣羊具五方色遺穗州人今祠中五石云是羊化殊不類祠後有崇臺可以眺遠其東爲三元殿殿前有池片石陂陀一泓出其中旁有石刻曰仙人足跡傳會可笑湛文簡公少讀書于此有詩刻石同遊者庭表嬰園翁山元孝超然燕思光孝寺僧月濤南柄

海幢寺

海幢寺在羊城南下瀕江水同庭表翁山元孝蒲衣往

遊冒雨發舟二里抵寺門木縣方花望如赤城之霞寺
有鷹爪蘭 林藤本大兩圍幹枝相糾花五出初出綠
色久之漸黃香與魚子蘭酷似寺故郭氏園蘭園中故
物也有藏經閣極偉麗北望白雲粵秀西望石門靈峰
西樵諸山東眺雷峰卽往波羅道也南爲花田南漢葬
宮人處素馨花產此寺爲僧今無所建龍象莊嚴甲諸
刹然無他奇稍宜登眺耳食罷登舟往海珠寺

海珠寺

海珠石在江中上有慈度寺宋李侍郎昂英讀書處寺

有李公祠面丹霞臺下瞰江水北帶羊城估舶漁艇往
來如圖畫爲粵人競渡之所明盛時豪家競以翠毛鶴
毳孔雀尾飾船篷用相誇尙其侈靡如此用兵後築城
置戍其上荒落不復振矣有吳道子石刻觀音像尙存
舟由濠水入魚藻門劉鋹時有稻田自海上浮來布衣
林楚材見兒嘆曰水魚湫湫兮南及宋師至潘美爲帥
人始悟爲潘字云飲濠梁別業晤梁秀才無技

越秀山

越秀山在廣州府城北城堞因山山分爲二東爲歌舞

岡越王臺其西爲觀音閣山半爲呼鸞道僞漢劉龔故蹟也城西爲朝臺山南越志云傍江構起華館以送陸賈因名朝臺也古蹟記云山巔有達磨泉山踞粵城最高處憑高下瞰遠江如帶目盡炎海粵人三月三日九月九日多遊于此城堞閒多榕樹木絲時暮春木絲方花紅照天外亦一奇也

蒲澗寺

三月初四日勞書升憲副約同忍菴叟園元孝遊蒲澗寺寺在白雲山麓氣象疏古寺門諸山環抱門內二石

碣刻宋蘇文忠公詩崔清獻公詞坐禪人大韶範成妙叶堂始食蕉子羊桃菖蒲澗在寺左太平寰宇志云菖蒲澗一名甘溪南越志云交州刺史陸允之所開也襄陽羅友累石澗側容百人坐古蹟記云南漢闢甘泉苑南有陸公亭夾溪刺桐木絲花開殷豔如畫時久旱細流涓涓出石罅中小魚如秧針千百爲羣東上尋濂泉寺半里許得石澗潺湲有聲涉澗而東樹益蒼蔚水聲益清激又半里復涉澗而西澗中巨石欹立騰倚類多姿制岸皆笏竹竹盡得寺寺數弓而朴雅絕塵老僧興

學海類編 卷之五 遊覽
五
遊覽
歎居之元孝言郡人陶璜苦子前身寺僧道安也因言
其從父陳公慧業記前生爲廬山僧事甚奇寺去濂泉
尚里許馭疲飢不能登坐澗石蔭竹樹俯聽水聲如鳴
琴筑下山遠見琵琶洲洲上浮圖巋然海鼇寺也歸食
寺門榕下是日甚暑清風洒然山相傳爲安期生得道
處上有景泰寺安期祠

長壽菴

長壽菴在西郭外勑于萬歷閒禪人大汕重新之汕能
詩畫營造有巧思寺西偏有池通珠江水增減應潮汐

池北爲半帆循廊曲折而東爲繪空軒軒前佛桑寶相
諸花叢萃可愛由半帆竝池而南緣岸皆荔支龍眼池
之南爲懷古樓高明洞豁其下爲離六堂水木清華房
廊幽窈如吳越閒寺有拈花釋迦像飾以黃金珠玉車
璪瑪瑙瑟瑟之屬莊嚴妙好又有銅像云是唐鑄也

南園三忠祠

大忠祠祀宋文信國陸丞相張越國三公其東祠南園
五先生五先生者孫典籍黃待制哲王給事中佐趙
御史介李長史德明初結詩社于南園此其遺址崇禎

戊寅巡按御史葛徵奇葺三忠祠并鑿五先生詩于版
久之皆廢同年彭吏部襄爲番禺令復新之祠有池閣
背枕河流亦一勝地

程